


CIIMO CALINO

CA MULIMO WANGU

 ...?...mukuba kukatala a kudekela loko. Elyo twa kajisi luswaanano lunji loko mu mugwagwa, miswaangano mibotu, a kujuzya Banakristo kuzwa ku busena kuyaku busena, kuzwa kutala, kuselemukila ku Nkomwe ya Kujwe, alimwi akwalo kutala lya Nkomwe ya Kumbo mu Canada. Elyo a kubelekela antoomwe kubotu akati ka mabungano oonse aindene atubungwe, a Asemblisi ya Leza, a Unaitedi Pentekoste, Mbungano ya Leza, Foursquire, a tubunga tumbi tunji twaka belekela antoomwe, ku kuba miswaangano mipati. Kuzwidilila kupati, kuciimo cikonzya kutegwa kuzwidilila sunu, alimwi antela banji inga bakwiita kuti “kupati.” Pele, lwangu, Ndime ii—ii—ii silubukulusyo. Alimwi lubukulusyo, kwaambaula ku cisi conse, kutandila kumana. Elyo tuli... Nda botelwa kubona lubukulusyo oko myoyo nkoi pya, kutali kuyungizya mamembala, pele lubukulusyo. Mwami wesu wakacita maleele manji aa kuponya bantu, alimwi, mubwini, basyoonto baka futulwa. Elyo lino Ndili ku ng'anda, kulyookezya kwa kaindi kaniini, a kujokela mu kuswaangana mu mvwiki zisyoonto, na Mwami wayanda.

² Elyo lino eci nca ku bantu banji a beenzuma bangu koonse mu nyika. Ndi yanda kwaamba sunumasiku, omuno mu cikombelo...Ikuti na yebo, kufumbwa wanu wakaliko alimwi wakonzya kubona, bala kasaala ncobeni mu cikombelo sunumasiku. Bantu bali zwide mukati akuzunguluka conse, kabaimvwi mukati, aanze mu myootokala yabo a zintu, nkabela kulapya kapati, alimwi inga kwayuma ku bantu akuli ndime akwalo.

³ Pele Nda boola ku busena obu obo mbo Ndi yanda kupandulula eco cibeela ca ciindi nco tupona mo kweendelana ku mulimo oyo Mwami ngwa kandipa. Elyo Nda kalikuyanda kwii rekooda kuzwa ku cikombelo. Ca kaboola ku moyo wangu ciindi cabutololo camamanino, pele Nda kalindila mane Nda jokela okuno kutegwa inga Nda jana ii—ii rekkordi ya ncico, ku cituma kuli ndinywe no bantu ba nyika.

⁴ Kwainda myaka itandila ku makumi otatwe ayobilo yakainda, kuti cindi Mwami Jesu, mu mayaadi ali mwaanda a makumi osanwe awo Mpe imvwi lino, omuno mu Jeffersonville ku Kagwagwa ka Eighth a Penn, cifumo cindi Ne kabikka ciswi cabuyake aa cikombelo eci, mukuba buyo cilobe. Elyo Nda kakkala kutala buyo lya nzila ku lumwensi lwangu okuno.

Lya kali eelyo Nke tana kwata. Nda kali kukkala a bataata a baama. Kuti Mwami Jesu waka ndisinsimuna cifumo kuti ciswi cabuyake nce keelede ku bikkwa, kutandila kufwambaana, kutandila sikisi okuloko. Elyo Nda kali lede mu bulo kwa ciindi cimwi, a moyo wangu uzwide lutangalo, kuyeeya ciindi eci cipati kuti Mwami Leza wakali kuyo ndipa cikombelo ca kukambauka mo. Nda kali mulombe muniini buyo eelyo. Elyo buzuba obo Nda . . . musimbi oyo ngo Ndali kweenda awe, oyo wakali mukaintu wangu cakufwambaana mwaka utobela, wa keelede kuba andiswe buzuba mbo twa keelede kubikka ciswi cabuyake.

⁵ Elyo Nda yeeya cifumo eco cindi ni Nda kasinsimunwa, elyo nkelede mukaanda, mubesena bwa matantilo mpoonya awa a Seventh Street. Cintucimwi cakati, “Buka ku matende ako.” Elyo Nda kabuka. Elyo Nda kabona, mbuli mbo cakabede, busena bupati, alimwi bwakali mbuli i—i—i busena oko nkoba kali kuyo. . . mulonga waka zuzila mu kkuti. Elyo Nda kaselemukila ku mulonga nkabela Nda kabumvwisya kuti bwakali busena Johane Mubapatizi mbwakali kubbiziza bantu, elyo baka cisandwide kuba cilao cangulube. Elyo Nda kali sikukazya maningi kuli ncico, kwaamba buyo kuti ta ceelede kucitwa.

⁶ Elyo kuciindi ni Nda kali kokuya, kwa kali i—i Jwi lya kaambaula kuli ndime a kundi nyamuna, elyo Nda kabona cikombelo eci mu kutandila buyo ciimo mocibede ndyoonya lino. Pele kwakali bantu banji loko kusikila bakali zwide buyo koonse mukati, mu cikombelo, mu ciimo eci, kujatikizya bube mocibede lino. Elyo Nda—Nda kali kkomene, nkeimvwi kunze lya cikambaukilo, nkekanana, “Leza, obo Mbolu kabotu kundipa cikombelo.”

⁷ Elyo, ku ciindi eco, Angelo wa Mwami waka ndaambila, a kuti, “Pele eci tacili cikombelo cako.”

Elyo Nda kati, “Mpawo, Mwami, cili kuli cikombelo cangu?”

⁸ Elyo Wa kandi sumpula mu Muuya alubo, akundi bikka ansi mu zivuna. Elyo kuyaansi kwini mu zivuna kwakali munkali ya masamu akakkede mu kweelana, kutandila kulampa kwa tukokola tuli twenti na theeti. Elyo akali kuboneka mbuli masamu aa mucelo, alimwi akali mu mabbakete mapati aa girini.

⁹ Elyo mpawo Nda kaziba ku janza lyangu lyalulyo a ku janza lyangu lya lumwensi, kwakali bbakete litakwe cintu ku lubazu lumwi, elyo Nda kati, “Ino kujatikizya zeezi?”

¹⁰ Elyo Wa kati, “We elede ku syanga muli ngawo.” Aboobo Nda kakwela mutabi kuzwa ku musamu kululyo lwangu a kuubikka mu bbakete ku lubazu lwa kululyo, elyo mutabi kuzwa ku janza lya lumwensi a kulibikka mu bbakete ku lubazu lwa lumwensi. Cakufwambaana akakomena lweendo loonse kuya mu milengalenga.

¹¹ Elyo Wa kati, “Ko tandabika maanza ako a kubungika micelo yawo.” Elyo mu janza lyomwe kwakaloka appo pati lyayelo, bbotu loko lya kabizwa. Alimwi mu janza limbi kwakaloka palumu pati lyayelo, bbotu loko lya kabizwa. Elyo kati, “Kolya micelo yalyo, nkaambo ndi bbotu loko.” Elyo Nda kalya kuli lyomwe akuzwa kuli limbi, mbotu linona kapati. Nywebo mulizi cilengaano, cili lembedwe muli limwi lya mabbuku, Ndi yeeya kuti, *Kaano ka Buumi*, na *Musinsimi Waswaya Africa*.

¹² Elyo mpoonya buyo Nda katambika maanza angu mujulu, nkabela ndakali koongolola bulemu bwa Leza. Elyo mpoonya biyo, oyo Musumpululu wa Mulilo wakaseluka atala lya masamu ayo, a kuvuuma a ndabo kazimweka, a myuuwo kayungu canguzu kapati, amatu akatalika kuunga ku masamu. Elyo Nda kalanga kulaale ansi, mpaawa kwakaimvwi ciimo ca cikombelo eci, nzila mbo cikkede lino. Elyo kumamanino oko cikambaukilo nko cakeelede kuba, kwakali masamu otatwe, alimwi ayo masamu otatwe akaba mu ciimo ca ziingano zzyotatwe. Elyo Nda kabona mapulamu a maapo babikkidwe antoomwe mu cikama kuzunguluka akati ka ciingano. Elyo Nda kazuzwa kufwambaana loko, nkekwiila agolela jwi lyangu, a kuwida aa ciingano eci, na ku ciingano, aku waala maanza angu ali ncico. Elyo myuuwo yaka talika kuzungaanina, alimwi i-i mucelo kuzwa ku ciingano, nkabela ya kandi wida koonse. Elyo Nda kali kkomene kapati, kubotelwa buyo. Elyo Wa kati, “Kolya mucelo wawo, nkaambo ulaboteleza.”

¹³ Elyo mpawo oku kuzunguluka kwa Mulilo kwakaita, akati, “I butebuzi bwabizwa, nkabela babelesi mba syoonto.” Elyo Wa kati, “Lino, cindi waboola kuli lwako alubo, na kuzwa muli ceeci, bala Timoteo Wabili 4. Timoteo Wabili 4.” Elyo mpawo Nda kaboola kuli lwangu. Elyo Nda kaima awo nke cumba busyu bwangu a maanza angu. Elyo mpoonya buyo, mu kkona lya kaanda, zuba kalibala kapati, mpawo Nde elede kuti ndali kungsi lya cilengaano ca oora limwi na kwiinda, elyo Lya kati, “Timoteo Wabili 4.” Elyo Nda katambikizya cakufwambaana ku Bbaibbele lyangu, a kubala Timoteo Wabili 4.

¹⁴ Lino, Ndi yanda kubala eco eno. Elyo mbuli bweenzu mbo ciboneka, mbuli Mbwe kabala oyu Timote Wabili 4, busena awo Mpe kalekela, alimwi ziindi zinji Nda kakambauka ali ceeco mu cikombelo eci omuno, ciboneka kuba ceenzu mukuti lyoonse Ndila ima ali ceeco. Lino muli Timoteo Wabili 4, tumpango tutaanzi tosanwe. Kwalo, *faivi* mweelwe wa “luzyalo.” Ndila bala ceeci.

Nda kulailila . . . kumbele lya Leza, a Mwami Jesu Kristo, oyo uyo beteka baumi a bafu ku kulibonya kwakwe a bwami bwakwe;

Kambauka ijwi, muciiindi ceelede, a muciiindi

citeelede; kulaya; kutapatila, ku kombelezya akukkazikamoyo konse a njiisyo.

Nkambo ciindi ciyo boola ncibati kaleke kuzumina njiisyo iiluleme; pele kuti baya kutobela zisusi zyabo beni akuli janina... baya kuli janina bamayi, bajisi kubotezya matwi;

Elyo bayo futatizya matwi abo kuzwa ku bwini, alimwi ayo sanduka muli zya mankwangalizya.

Pele kolangilila mu zintu zyonse, kokakatila mu mapenzi, a kucita mulimo wa muvangeli, a kubamba cizibyo cizwide ca mulimo wako.

¹⁵ Sena mwakasola kubona, elyo Nse kaiziba mane mu Kaandakaniini aka kamamanino, Nse na bala limbi Lugwalo olo kusikila okuya? Nko konse Kwe kasola kucibala nkaambo eco cakaboneka mbuli kuti ca—ca kakkutya, nkaambo cakali kundaambila kukambauka Ijwi a kukakatila mu mafwabi, akuba sikukkazikamoyo, nkambo ciindi cakali kuboola niba kali kuyoleka kuzumina ku Njiisyo iniini, pele kutobela zisusi zyabo beni baya kuli janina bamayi, bajisi kubotezya matwi, alimwi baya kufutatila Bwini kuya mu mankwangalizya. Pele, eno, Taakwe na kaamba kuti Nda kali muvangeli. Wa kati, “Kocita mulimo wa muvangeli.” Paulo kaambila Timoteo, mwabona. Sena mwakabona nzila mbo caamba? Ta kaamba kuti, “Lino, yebo wakaitwa kuba muvangeli.” Lya kati, “Kocita mulimo wa muvangeli.” Mwabona? Lino, tula bona awo mpawo. Lino, ikuti na inga Nda amba a moyo wangu oonse a bubotu bwa luzibo lwangu, olo lwa kazulizigwa ku lugwalo. Mbubonya buyo. Elyo eyo myaka iili makumi otatwe yakainda.

¹⁶ Elyo kuciimo mbuli Mbwe zyi, kuti cilengaano coonse eco Nca kasola kundipa caka zulizigwa, kunze lya comwe kuti Nda cinca mulimo wangu, oko Nkwe elede kukombela bantu mu busena buniini mbuli kaanda kaniini kungsi lya tente, na buyake bupati na cintucimwi. Ca kalibonya, kuli ndime, mbuli tente. Mula yeeya eco, myaka yobile na yotatwe yakainda? Bunji bwa ncico coonse caka letwa kucitika. Nda kaselemukila mu Mexico, anzila mboya kawa mvula masiku ayo aceco cakali kuno citika kumusanza okuya. Elyo Wa kandaambila mulimo wangu wa Kukwelwa Kutaanzi. Amuyeeye kujatikizya kujata nswi niini, na kwiimpya? Kumwi kwabili yakali nswi niini. Pele mpawo Wa kandaambila, “Aa Kukwelwa Kwatatu, uta kakilwi. Mwabona? Elyo uta ambi bantu.” Ndi sola kupandulula eco Nce sola kucita. Ta ndilekeli kuziba kwaambila bantu ncoli mukucita. Kocita buyo eco Nca kwaambila kucita a kucilekela cilikke. Mwabona?

¹⁷ Pele Ndili musyobo oyo wa muntu, Nse jisi maseseke, aboobo Nda amba buyo zintuzyonse Nze zyi. Aboobo, eyo—eyo nje misyobo buyo, Nda yeeyela. Pele kuti, Nda sola . . . Nda bayanda bantu, alimwi Ndi yanda bantu kufutulwa bubu loko mane Nda

sola ku baambila zintu zyoonse nze Ndizi, citakuti ncutucimwi Nca kandaambila kutaamba, mubwini, kutegwa bata kaciimpyi. Mwabona? Ndi yanda kuti babone kabotu loko cakuti takukabi bulubizi muli nco.

¹⁸ Lino, eco cakacitika mbubonya buyo. Lino amuyeeeye, kubbadela kwakali, ikuti na tuyo langalanga eco kwa kaindi kaniini, “Nda kulailila kunembo lya Leza, a Mwami Jesu Kristo, Nguni uyo beteka baumi a bafu ku kulibonya Kwakwe mu Bwami Bwakwe.” Mwabona? “Mubetesi. . . Ula kulailila kunembo lya Leza, a Kristo, kuti yebo—kuti ukambauke Ijwi.” Elyo aboobo amundi gwasye, mane busiku obu, kuciimo mbuli Mbwe jisi luzibo luli loonse lwa, Nse na kambauka cintu cita Ijwi, mwabona, a kukkala ncobeni a Ndilyo. Lya kali penzi loko, alimwi Nda kainda mu kupenzegwa kunji a masukusyo manji, kacita kwandaanya kuzwa ku beenzuma banji bayandisi nkaambo ka kaambo ako nkakonya, “Amu kambauke Ijwi.” Elyo Ndi—Ndi jisi. . .

¹⁹ Nywebo mula yeeya mu cilengaano, na, kucincululwa kuniini mbuli mbo Ndi konzya ku ciita, calinolino, oko Nkwe kabwegewa a kubona bantu abo a kulanga musule kuli lwangu a mamilioni ayo oonse awo. Elyo Nda kati, “Ndi yanda kubona Jesu.”

Elyo Wa kati, “Uli atalamaningi.”

²⁰ Ee, mwabona, cindi bantu bafwa, taba—taba unki buyo kutala a Leza. Lino, nywebo, Ndili masimpe muyo mvwisya eco. Ndiza Nde elede ku cipandulula kabotu loko mbuli Mbwe konzya. Sa muli bindide mpawo? Atu bweze ciindi cesu mpawo a—a—a kusola kucibamba antangalala mbuli mbo Ndi konzya.

²¹ Lino, cindi twa boola ambali, tula yeeya kuti tu pona okuno mu kweeleka kotatwe. Alimwi Nse zyi naa Nda konzya kuzyulika mazina na pe. Cimwi cazyo mumuni, a cimbi ncintuntu. Tommy, ula yeeya eco catatu mbo cibede? [Muntu umwi waamba cintu cimwi—Mul.] Huh? [“Atomu.”] Atomu? [Muntu umwi umbi waamba, “Ciindi.”] Ciindi. Ncibotu. Lino, mumuni, cintuntu, a ciindi. Elyo magano esu osanwe akwaba zilao. Kukubona kwesu kukwaba mumuni, kulimvwa kwesu kukwaba zintuntu, azimwi.

²² Lino, pele tu jisi kukwabana kwiinda mu sayaansi, cilao cane, mbuli mbo cakabede. Nkaambo kuboola monya mu buyake obu lino nzifwanikiso, majwi a maredio, zifwanikiso aa televizhioni, kuti magano esu taana kukwaba eco, pele nekubaboobo bajisi ii—ii tyuubbu na krisito eyo ijata ayo mayuwe a ethar akwa yubununa. Aboobo, nywebo mwabona, monya mu buyake obu eno kuli micito icitika iya bantu, mu luwo, majwi aambwa. Bali waano. Tuli cizi. Bwalo mbwini ncobeni. Elyo cintu biyo nco cita, bala—bala cijata aa. . . Nse mvwisyi

bupange bwa—bwa zintu ezyo sayaansi nzoya kaanza, pele tu lizi kuti cila tondezya kuli ndiswe kuli bube bwane.

²³ Lino, cilao casanu mpaawo sizibi, sikutasyoma aafwa nkwaunka. I cilao casanu ngu, musyobo wa i, ee, cilao ciyoosya. Lino oyu muntu. . .

Elyo cindi Munakristo afwa, ula njila mu bube bwacisambomwe.

Elyo Leza uli mu cilao caciloba.

²⁴ Lino mpawo, nywebo mwabona, Munakristo cindi afwa, ula unka kungsi lya cipaililo ca Leza, moonya mu Busyu bwa Leza, kungsi lya cipaililo. Elyo uli aa kulyookezya.

²⁵ Ku cipasula, cindi muntu ano jisi kucitikwa kubbi masiku, ta onede kumaninina, alimwi ta nsinsimukide. Uli akati ka koono a kusinsimuka, alimwi eco nce cimubamba kuba uzungaana kuyoosya a kukwiila, nkambo ta onede, ta sinsimukide pe. Elyo kubweza ceeco, kutondezya oko muntu nkwaunka cindi afwa katana kusanduka. Wa kaponi ciindi cakwe cakukkwana, uli fwide aa nyika; alimwi ta konzyi kuya mu Busyu bwa Leza, nkaambo ta elede kuya omuya kakutakwe Bulowa. Elyo wajatwa. Alimwi ta konzyi kujokela ku nyika, nkaambo ciindi cakwe camana ano aa nyika, alimwi wajatwa akati, alimwi uli mu ciloto ciyoosya. Mwabona? Ta konzyi kunjila mu Busyu bwa Leza, ku kulyookezya. Elyo ta konzyi kujokela, kuboola aa nyika, nkaambo ciindi cakwe cili kkwene. Uli mu kucitikiwa kubbi, alimwi awo ula kkala kusikila ku buzuba bwa lubeta. Cintu ciyoosya kuba mukati, mwabona.

²⁶ Elyo lino mu cilengaano eci, Nda syoma Nda kajatwa ku mwaakwe oyo wacisambomwe, kulanga kusule awa a kukonzya kubona musule. Mwabona, kukubona takuli nconzyo a meso, oko nkwanyika. Pele kukubona naitu cipati maningi kwinda. . .I kukubona oko nkoba jisi okuya, kukwaba kwabo kulaindilila loko ku kukwaba kumwi oko magano esu akunyama nkwaakonzya kukwaba.

²⁷ Okuno ciindi cimwi cainda Nda kali kucipandulula. Nda kali kulanga ku cifwanikiso ca cipekupeku oko nko bakalekela mwaalumi kunselelo, Ndi yeeya kuti mamaile obile na maile kungsi mu lwizi, alimwi baka jisi mimuni ya mitunga ya kazwa. Ba kali kutondezya buumi bwa mu maanzi. Elyo mpaawo kwakasika nswi ambali, ezyo zilenge zilibonya kuyoosya. Kuti, alo mpakati kamasiku, inki usiya ansi alya. Elyo ba kali jisi fosifolasi mu mpemo zyabo nkabela teeba kajisi meso. Lino, zyeede kusaninwa, aboobo cakali kuboneka mbuli kuti, kujana cakulya cabo, baka sololelwa a kuyeeya kumbi; kutali kukubona, nkaambo teeba kajisi meso, tiiba kakonzya kuzi belesya kumusanza okuya. Pele bakasololelwa a kuyeeya kumbi oko nko bakali kukonzya kukwaba cakulya cabo. Elyo Nda kayeeya, “Ikuti na Nda konzya kweendelezya nswi eyo

niini a kukubona kwangu, nkunji buti Nkwe konzya kupa cakulya cakwe akumu sololela ku masena, nkunji buti maningi kukubonakwangu kwinda redar yakwe nja kwabya.” Mwabona? Elyo Nda kayeeya, “Ikuti na Nda konzya buyo kumusololela!”

²⁸ Mpawo caka boola kuli ndime, “Ikuti na Nda konzya buyo kulipa lwangu kuli Leza, obo mbo cili cipati maningi ku kubona a magano aa Leza, Oyo uukonzya kutu sololela kunji kwiinda zintu ezyo nzyo tubona, nkaambo lusyomo olo Ndwa tu gwasya ngu citondezyo ca zintu zitabonwi a meso esu.” Mpawo ikuti na ako kaswi kaniini taka konzyi kusika atala lya meenda mbuli kaswi kambi, nkaambo kafundilizigwa. Ko kaibula, inga ka bbotoka. Kutali kwinda mbo tukonzya kutanta mujulu loko a kuta bbotoka. Tula fundilizigwa nkambo i—i busena mbo tuponamo.

²⁹ Pele lino ikuti na eyo nswi niini niya kasola kusika atala awa a kuba ndime, sa inga wayanda kuba kaswi ako alubo ansi mu kusiya kwa kwaakat kamasiku? Inga na takayanda kuba nswi limbi, nkaambo ncintucimwi cipati kwiinda inswi, walo muntu; magano akwe mapati maningi, kumvwisya kwakwe nkupati maningi, bupampu bwakwe mbubotu kapati. Mpawo motipulaya eco a mamilioni ali kkumi, mpawo ula jana mbo cibede cindi wazwa kuli ceeci kunjila mu Busyu bwa Leza kulaale, oko muntunsi kwasakene maningi kwinda mbo tubede awa. Inga toyanda kuba muntunsi mbuli oyu limbi, kunselelo mu ng’anda eyi ya malwazi a bubu. Cali mu moyo wangu, kuti Nda sola myaka eyi iili makumi otatwe kukambauka Makani mabotu koonse ku nyika, kwaambila bantu kuti kuli Julu lya—lya kujana alimwi kuli gehena ya kukaka, alimwi kuli Leza ukuyanda, alimwi ii—ii nguzu zinununa zili bambide kuku bweza kufumbwa ciindi wano libambilide ku zitambula.

³⁰ Mbuli muntu unyikila, lutambo kalulengelela alya, ula yeeya, “Ee, lutambo, inga Nda konzya kuli somona lwangu, pele ta Ndeelele ku bweza lutambo.” I lutambo lwaka bikkwa awo ku bukanze mbubonya, kuli nduwe ku kulisomona lwako. Ako nkekaambo Jesu Kristo nca kafwida, ku bukanze mbubonya bwa kufutula basizibi. Elyo Wa kalengelezya lutambo lwa Buumi Butamani, kwalo obu busiku mbubonya luyo inda ku mutwe wa sizibi onse omuno, a citondezyo cakatambulwa kacilengelela aali ncico, “Kozwa muli ncico.” Ikuti—ikuti na nywebo—ikuti na mula yanda kucicita, kulibambila kwabambwa.

³¹ Lino, cindi Ne kabona busena obo a ciimo eco bantu abo moba kabede, a nzila kwiindilila cintu cili coonse eco nyika eyi ncoyaka konzya kusola kuyeeya, cakali cabulemu. Kwakanyina cibi okuya, taakwe lufu naanka cintu cikonzya kunjila mu kasena ako. Elyo kwakanyina lwandaano akati ka baalumi a banakazi, biyo i—i magilandi aankwela akali zwide kuli mbabo, alimwi inga kakutakwe mamambe, kaatacikwe cintu. Pele wa kacili mwanakazi munzila ya bupange, a mwaalumi wakacili

mu bupange, alimwi bayooba boobo kwalyonse. Nkaambo cindi Leza. . .

³² Lino eci inga caba cibotu, bamwi banu bana ba cikolo cipati oko nkubweza zintu ezi kuyiisigwa muli ndinywe okuno kujatikizya kucinca bucebuce. Lino, Nda syoma kuya busumpuka bucebuce, pele kutali mu nzila eyo muntu mbwa kakomena kuzwa—kuzwa ku musyobo umwi wazilenge. Lwiiyo lwabo lulaba nyonganya beni cindi basola kutintanya cili coonse, tacika litintanyi kujoka. Aboobo, nywebo mwabona, ca—ca kaba jokola munzila ya bubu.

³³ Lino, Ndisya syoma kuti cindi Leza nakatalika kuzuzya nyika, ndiza cintu citaanzi Nca kayutuka yakali jelifishi, a kuzwa awo kuli cula, akuya butanta. Pele, nywebo mwabona, cila zumanana kuswena muni loko a kuswena muni ku cinkozya ca muntu, alimwi muntu wakali kutondezegwa kwa Leza. Elyo nke kaambo bwizu bwa kacinca, ndiza bwizu, elyo mpawo kuzwa ku bwizu kwakasika malubaluba, kuzwa ku malubaluba kwakasika ziteo, kuzwa ku ziteo kwakasika samu. Nkaambonzi? Nci fwanikisyo ca Musamu wa Buumi kawiiimvwi ku lubazu lumbi. Elyo zintuzyonse ku lubazu olu zya kunyama ncimvule ca Cigambyociinda na Butamani ku lubazu lumbi. Nkikaako, kufumbwa kuti kakuli Munakristo wakazyalululwa aa nyika, alimwi tu jisi mubili awa mbuli obu, ngu citondezyo neiconya ca umwi oyo uulindila ku lubazu lumbi oko kutakwe lufu a buusu. Alimwi eco nce cibamba myoyo yesu kufwa nzala mbuli ya ceeco. Mwabona, kuli cintucimwi muli ndiswe eco ciita. Tu buyo. . . Kuli cintucimwi eco citwaambila kuti nko cili. Nda syoma kwiinda mu myaka eyi. . . Nda lilekelela kumbele lya Leza a bantu, nkaambo kakuba bafuba a kuba. . . kupanga bulubizi bunji. Pele kwiinda mu myaka eyi minji Nda kali acoolwe kubona bantu banji bali mamilioni banjila mu Bwami bwa Leza, alimwi ba kalumba ku Mwami kundi lekela kubasololela okuya. Elyo Nda syoma bayooba kokuya ku buzuba obo.

³⁴ Lino, cilengaano cakazulizigwa. Elyo nzila mbo Nda kasola kwiima, mukutaziba, aa kampango ka 5 ako. Nku koonse nko Nda kasola kubala. Pele kuli kunji kumbi ku capita eyo, tumpango tumbi tusingoonto. Lino, inga wacita, mu kaanda ka hotelo yako na mung'anda sunumasiku, twa mwaika buyo, kabale cimwi ca ceeco, nkaambo Ndi jisi Magwalo masyoonto aalembedwe awa ayo Nge yanda kutondeka, a bulembo obo mbo Ndi yanda kutondeka. Elyo Ndi yanda kuti mu cibale cindi mwaunka ku ng'anda. Njo cibalulula, ciyooba aa teepu. Uyanda kweengela cimwi ca ncico, baa, kulaba kabotu.

³⁵ Lino, sena mula syoma kuti baalumi a banakazi, eco Nce zyi kuti mula cita, basololelwa aa Muuya wa Leza kucita zintu? Mwabona? Elyo Jesu wakali mukozyanyo wesu. Ikuti na mwacibona, Ndi yanda kuvununa, amu jule andime, ku Musalali Luka, cipati ca 4, aniini buyo. Elyo Ndi yanda kumutondezya

cintucimwi cibotelezya. Elyo kutegwa tu tajani kunji kwa zyakutondeka ezyi, pele kuti muyo konzya kubala a ndime awa, kuli ceeci cimwi, kwa ziindi buyo zisyoonto. Musalali Luka, cipati ca 4 a kampango ka 14, tula talika. Lino amulangilile kabotu loko awa ikuti na muyanda kubona cintucimwi kucitika, eci caka tondezegwa. Lino amubone.

Elyo Jesu waka jokela mu nguzu zya Muuya ku Galilaya: . . . Wa kabweeda mu nguzu zya Muuya kuya ku Galilaya: elyo mpaawo kwakaba mpuwo yakwe moonse mu zisi zyeengelede kuli konse.

Elyo wa kayiisya mu ma sinagogi abo, mukuba abulemu bwa boonse.

Elyo wa kasika ku Nazareta, oko nkwa kakomezegwa: elyo, mbuli cilengwa cakwe mbo cakabede, wa kanjila mu sinagogi aa buzuba bwa sabata, a kwiima ku kubala.

Elyo mpaawo kwa kapegwa kuli nguwe bbuku lya musinsimi Isaya. Elyo cindi na kajula bbuku, wa kajana busena awo mpo li lembedwe, kwakali lembedwe,

I Muuya wa Mwami uli aali ndime, nkaambo wa ndinanika ku kambauka makani mabotu ku bacete; alimwi wa kandi tuma kuponya batyokede myoyo, alimwi kukambauka kuvunwa kuli baabo baangidwe, alimwi kuponya kukubona kwa boofu, alimwi kupa aa bulubusi, balo baka cuzaulwa.

Alimwi kukambauka mwaka uusalidwe wa Mwami wesu.

Elyo wa kajala bbuku, . . .

³⁶ Lino, na ula yanda, ikuti na uyanda ca kutondeka kuli ceeco, Ndi cijisi awa, asyoonto buyo, ikuti na ndiza Nda cibweza kuzwa mu kubala kwa magini awa. Ikuti na mwalangisya, eco acalo, muyo cijana muli Marko a masena aindene, pele muli Isaya 61:1 a 2. Lino, sa tacili ceenzu kuti Wa kaima mpoonya awo, a kampango nkakonya katobela . . . Eco nce cakabikwa ku kuboola Kwakwe kutaanzi. Elyo kampango, kabili katobela, nku bikka ku Kuboola Kwakwe Kwabili, ku lubeta. Wa kaima a kujala bbuku. Ikuti na umwi wanu uli mukubala Bbaibbele lya Scofield, uyo jana bupanduluzi bwa tende aali ndilyo awo. Mwabona? Langa futinoti yako, engela ku futinooti, wabona, nkabela ula ziba alya. “Ii lweezyanisyo antomwe a—a mulumbe wabalululwa, muli Isaya 61:1 a 2, kukonzya mukonzyanyo wa i . . .” Awo, Lugwalo awa, nkekambauka, Jesu wa keelede kukambauka mwaka uusalidwe iwa Mwami; a kampango katobela kazwa a Kuboola Kwakwe a lubeta. Mwabona? Elyo mula bona obo Mbwa kaima mpoonya ali ceeco.

³⁷ Elyo Mbwe taka ciziba eco, alimwi obo Mbwe kaima lyoonse akampango aka ka 5, “Nkambo ciindi ciyo boola

nobata zumini Njisyo iniini, pele baya kuli janina bamayi, bajisi kubotezya matwi, nkabela bayo tantamuka ku Bwini kuyaku mankwangwaalizya. Pele cita mulimo wa muvangeli, bamba cizibyzo cizwide ca mulimo wako.” Mwabona? Elyo ku lugwasyo lwa Leza a luzyalo Nda kasola kucita ceeco. Elyo Ndi yanda beenzuma, boonse okuno a kumasena mu masi oko mateepu nkwayo unka, nkaambo Nce kabwezela kwiima Nkwe jisi ku Ijwi, aka nke kaambo keni: “Kambauka Ijwi.” Ako nke kaambo Nce ta keendelana atuyanza tumwi twabuzumini, kufumbwa tubungwe, nkaambo Nda katumwa aa Leza ku kkala a Ijwi. Lino ikuti na umwi umbi uyanda kucita cintu cili coonse cimbi, eco cili kuli mbabo.

³⁸ Elyo ikuti na mwalangisya, mu cilengaano eco Nce kajisi kat-. . . mulimo wangu, wakali Ngwe ntana zabuka zisamu ezyo. Nsena kusandula umwi. Nsena kwaamba kuti, “Boonse bana trinitaria babe babumwi” na “bonse babumwi babe bana trinitaria.” Nda byala mu zilongo zyabo zini. Mbubonya buyo. Nda kainka kubana trinitaria, Nda kainka kuli babumwi, Nda kainka kuli boonse, akukkala akati akuta sola kusangana kamwi kabo; pele kakkala akati, mukuba mukwesu, mbubonya buyo eco cilengaano nco cakaamba kucita. Elyo Nda kalya micelo kuzwa ku mabazu oonse, lufutuko aa mabazu obile.

³⁹ Elyo lino, sena mwakabona, kuli bantu banji bana trinitaria bakkede awa, kuli bumwi bunji, elyo kuli bamwi banji bandeene. Pele obo kuniini mbo konzya kukwankwana kujatikizya ncico, nkaambo ikuti na eco cibeela ca cilengaano cakali bwini, cibeela cimbi cili bwini, acalo. Yoonse micelo yaka janwa mu ciingano. Mwabona? Bobilo babo bakali mu ciingano, boonse bakajatana antoomwe, alimwi mapulamu a mapear, na mapechi, mapulamu, a maapele akandi wida alya. Onse angawo. Boonse baka janwa mu ciingano, nkaambo boonse bakasyoma muli Leza alimwi bazwide Muuya Uusalala, a kuba a milimo ya Bunakristo a zitondezyo kazitobela.

⁴⁰ Lino, kabungwe takakabi a cintu cakucita a njiyo. Iyooba yakazyalululwa iya kuba cimwi cakucita anjiyo. Lu yooba luzibo lwanu a Leza olo luyo elela kucita andulo. Lino, tula bona kunji loko kwa ceeco. Ndi jisi Magwalo masyoonto awa ayo nge Ndi yanda kutondeka. Ndiza Njo cita ciindi cimbi aniini.

⁴¹ Pele lino Ndi yanda kumu gusya kuzwa ku kampango ka 5, kuselemukila ku kampango ka 18. Elyo lino kuvuna ciindi, Nse—Nse kacibali. Pele lino Paulo, katantamukide awa muli Timoteo alubo, ikuti na mwalangisya nzila mbwa talika kukanana, cuusisya nsoni. Lino ikuti na mwalangisya kumane kampango ka 5.

*Nkambo lino Nda libambila kutuulwa, alimwi ciindi
cangu ca . . . kuzwa cili afwaafwi.*

Kulibambila kusiya aabusena. Kutalika kweenda, mwabona, “Ndi jisi . . .” Ee, amulangilile. “Ma . . .”

. . . Ndili libambilide, a *kuzwa kwangu kuli afwaafwi*.

Nda kalwana nkondo mbotu, Nda lumanizya lweendo lwangu, Nda kalubamba lusyomo:

Kuzwida awa kuli bikkidwe musyini wangu wa bululami, oyo Mwami, mubetesi ululeme, uyo ndipa ku buzuba obo: alimwi kutali ndime luzutu, pele. . . boonse abalo abo bayandisya kulibonya kwakwe.

⁴² Elyo mpawo ula zumanana kwaamba, “Kocita zyoonse, kucita zintu ezi.” Inzi? Kuli nguwe kuleta bbaki. Lino tu talikila mpoonya awo, elyo ula amba:

. . . *Demasi wa nditantamuka, . . .*

⁴³ Ku leelede kuboola ciindi mu mulimo wakwe cindi nakali muvangeli muniini, musinsimi mukubusyi, bantu boonse bakali nguwe. Pele lino mulabona anselelo awa, wa kati:

. . . *bantu boonse baka ndisiya mebo: . . .* (Ku kaambo nzi? I Ijwi.)

⁴⁴ Cindi Jesu, Musinsimi mukubusyi waku Galilaya, Wa kajana ciindi eco Na kasiigwa. Bonse bantu baka kkala a Ijwi lya Leza balasika ku busena nkoba siigwa a inyika a inyika ya bukombi. Jesu waka sanina zyuulu zyosanwe, buzuba bumwi, alimwi baka bwezelela zinzuma zizwide i—i tufwefwelenga kuzwa ku zinkwa zyosanwe a nswi zyobile. Elyo buzuba mbubonya bucilila, Nda syoma mbo cakabede, Wa katalika kuseluka aansa a Ijwi, nkabela boonse babo bakatalika kuzwa kuli Nguwe. Elyo Wa kalanga koonse kuli basikwiya, a kuti, “Sa mula unka, anywebo?” Nobaba makumi ali ciloba aa bakutausi Bakwe Beni baka Mu siya. Elyo Wa kati, “Sa mula unka, anywebo?”

⁴⁵ Elyo mpawo Petro wakaamba majwi ayo mabotu kapati, a kuti, “Mwami, nko kuli nkotukonzya kuya? Yebo olikke nduwe ujisi Buumi Butamani.”

⁴⁶ Amubone. Pele ciindi cilasika ku ciindi cakutantamukwa, alimwi ci—ci leelede kusika. Ci leelede kuboola. Elyo lino Ndi jisi basinsimi basyoonto a zintu mukati muno zya kutondeka, ku mutondezya kuti ciindi eco casika. Elyo caka ndisikila. Ta kuyandikani kusola kucumba kuzwa kuli ncico, cili waano nkabela mweelede buyo kucitola. Tiiba kakumba kuzwa kuli ncico, ba kaima a kucitola, alimwi kutausa nsoni zya Makanimabotu.

⁴⁷ Nywebo mula bona Paulo, “Nda kalwana nkondo mbotu. Nda manizya nzila yangu. Nda kabamba Lusyomo.” Oh, ma! Kuyabuya ansi awa lya kati, “Nda kalwana a banyama. Elyo Nda—Nda kavunwa kuzwa ku mulomo wa mulavu.” Elyo zintu mwa kaında, Leza wakali kabotu kuli nguwe. Pele ciindi cacasika na keelede kwiinka.

48 Lino, atu libuzye, nkaambonzi muntu, mukutausi, muzolwani mbuli Demasi mbwakabede kuli Paulo, kusola kusiya Paulo?

49 Muli muzyi Mukwesu Baxter, bunji bwanu mula muyeeya. Wa kali kunga wabala. . . Lwa kali kujatikizya Demasi. Wa kati, “Yebo ulizi eco nce Ndiyo cita, Mukwesu Branham, cindi Nda kusika ku Julu, cintu citaanzi nce Ndiyo cita?”

Elyo Nda kati, “Inzi?”

50 Wa kati, “Ndiyo enda nkoonya kunembo akujana Demasi mpabede, Njo mwaambila mudinka canguzu mbuli Mbwe konzya.” Elyo kati, “Uyo vuuluka a kwaamba kuti, ‘Baxter, ino inga wacitila nzi eco?’” Wa kati, “Nkaambonzi nco kamusiya Paulo muubauba mucete cindi bantubonse niba kamusiya?” Nse lembi ceeco, Nse syomi kuti bayooba a kulwana kumwi kutala okuya, pele Nda yeeya buyo kujatikizya Mukwesu Baxter kaamba boobo nkaambo wa kalimvwa kuusa loko kuli Paulo.

51 Ee, ncinzi Paulo nca kacita? Wa kakambauka cakusyomeka mbuli mbwa kali kukonzya, nkabela Muuya Uusalala wakali ali nguwe. Elyo cindi nakalemba alya kujatikizya abo balindu bakutausi a zintu, Nda yeeyela kwakali kubbotoka. Kati, “Aba lekwe banakazi kabaumuna mu mabungano, akuta zumizigwa kukanana,” elyo walo kali mu ntolongo kuciindi nciconya.

52 Sa inga mwayeeyela eco bamwi babo mabbishopo ncoba kaamba? “Huh! Oyo mulombwana kutala mu ntolongo, ino makani nzi nga jisi akulemba awa antomwe andiswe? Mwabona? Alimwi ujisi Timoteo, sikunywa waini, antomwe anguwe. Elyo aboobo ngooyu uli kutala kuya lino, kuti usanina Timoteo aa waini, elyo ngooyu uli lede mu ntolongo, a kulemba, ku twaambila eco Muuya Uusalala nco weelede kutwaambila kucita.”

53 Pele wa kati, “Ikuti. . . Inzi? Sa Ijwi lya Leza lyaka zwida kuli ndinywe, alimwi Lya kasika kuli ndinywe luzutu? Ikuti na muntu uuli oonse ulayeeya mwini kuba simuuya na musinsimi, azibe kuti eyo Nje lemba yalo Milao ya Mwami.” Mwabona?

54 Mwabona, ciindi casika, beenzuma. Elyo Ndi yanda bantu mu cisi eco mateepu nkwaunka, kuyeeya kuti ciindi ca kwaandaanya ceelede kusika. Ce elede kucicita. Ta nzyi Mbwe sakene kuzwa ku ciindi camamanino, magolelo a lweendo lwangu. Ta ndizyi. Cili kuli Leza. Ta ndizyi juunza mbo kubobede, alimwi oyo. . . Ta ndizyi nco bujisi, pele Ndili muzyi Oyo ubujisi. Aboobo awo mpempawo lusyomo lwangu mpo luyakidwe, aali eco.

55 Lino, Nda yeeyela Demasi taka musiya buya akutalika kuya ku manaiti kkilabbu. Nse yeeyeli kuti Demasi waka cita ceeco, nkaambo Demasi wakali muntu wakazwidwe Muuya. Wa kali mugwasyi mupati. Na wakasola kubweza makani akale ajatikizya Demasi, wa kali mukambausi waka zizilwe, muntu

wa kayiide kabotu, wakalondwedwe kapati, wakayiide. Wa kali muntu musongo. Pele nkaambonzi nca ka siya Paulo? Eco nce cintu. Ncinzi caka mubamba kucicita, kusiya Paulo? Nse syomi kuti wa kali kuyanda kuya ku naitikkilabbu na cimwi. Pele Ndi syoma kuti wakali Leza kaandaanya Paulo. Lino Nda yeeyela Demasi. . .

⁵⁶ Atu bweze miyeeyo ya Demasi imwi. Mbuli mbo Nda kakkede kunselelo ku lubazu lwa cilundu, kandiyeeya buzuba bumwi, kutandila mumuni wazuba, elyo Nda kali kuyeeya, “Nkaambonzi Demasi nca kayanda kusiya muntu oyo? Nkaambonzi nca kalinosiya oyo mukambausi muniini mucete waka musololela ku Mwami, muntu wa katalisiya lubukulusyo akati ka Bamasi, musinsimi nconzyo?” Taakwe muntu wakali kukonzya kwaamba cita kuti wakali musinsimi. Wa kali kwiindilila kuba musinsimi, wa kali muapostolo, a muapostolo mupati singuzu kuli Bamasi. Alimwi Demasi nakabeleka a Paulo, kajisi luswaanano, akubona Muuya wa Leza kuyanda a muntu oyo. Elyo nkaambonzi nca kalino futatila muntu uli boobo mbuli oyo, waka simpikizigwa kuti wa kali mulanda wa Kristo? Sena mwabona Paulo awa, “Kuyanda eyi inyika iliko.” Lino, Nse yeeyi kuti Demasi wakaliwide. Nse syomi kuti wa kacita ceeco. Pele Ndi yeeya kuti wa—wa kajana muzeezo uulubide wa Paulo.

⁵⁷ Lino, Demasi wakali kuzwa mu mukwasyi uvubide alimwi wa kali simbono kapati, a mali ziindizimwi aamba bukombi ku bantu. Mbuli mbo baamba mu California, “Ikuti na tojisi ma Cadillac otatwe, toli simuuya.” Aboobo caamba kuti, ikuti na tozwidilide, ikuti na tojisi mbungano mbotu kwiinda iliko mu dolopo, bantu taba kainki. Citandila kuba munzila eyo okuno, Poogh. Yebo, weeledo kuba a mbungano mbotu kwiinda mu cisi, na ba lati, “Yebo, oh, waamba kuti waka swaangana a nkamu niini mbuli eyo?”

⁵⁸ Sena mwakalizi kuti Mwami wesu taka jisi busena bwa kulazika mutwe Wakwe? Sa mulizi kuti Wa kajisi bbaki lyomwe luzutu? Mwabona? Elyo Wa kajisi. . . Wa kali musyobo buyo wa muntu waka tontaikwa konse. Elyo Ta kajisi busena bwa kulazika mutwe Wakwe. Pele bakali kukonzya kuyeeya cintu nciconya, a kucita, kujatikizya Nguwe.

⁵⁹ Elyo, eno, Ndi syoma kuti Demasi wakabona kukakilwa, mukuboneka, mu mulimo wa Paulo. Ndi yeeya kuti wa kayeeya mulombwana mudaala waka sanzigwa, kumbele lya Leza. Lino, wa kayeeya kuti bantu bayo gusya meso abo kupa kuli Paulo. . .

⁶⁰ Lino, Paulo wa kateeti, wa kati, “Inga waba, nokuceya, kunonkola meso ako, kwaapa kuli ndime.” Nkaambo, Paulo, tu yeeya kuti, waka jisi meso mabi, nkaambo wa kati, “Nda kalemba a tubala tupati mbuli boobo.” Wa kati, “lugwalo lupati,” pele Ndi jisi i—i lekisikkoni, elyo lilati, “a tubala tupati.”

Wa kali mu Rome, mu ntolongo omuya. Cakali cintucimwi cilubide, wa kati meso akwe akali kumupenzya kuzwa ku cilengaano ca Kujulu. Aboobo wa . . . Bantu niba kanonkola meso abo, kubona Paulo kapenga, meso aakwe kamu penzya, alimwi wa kali kuciswa. Elyo wa kalomba Mwami kumuponya, ziindi zyoatatwe. Elyo wa kati, “Kutegwa Ntali sumpulwa aatala lya kuvula kwa Ciyubunuzyo, kwa katumwa kuli ndime mutumwa wa dyabulosi kuti azondinke.” Lino, nicakaba kabotu loko, mpawo ku muuma alubo. Mpawo na kaba kabotu, aku muuma alubo.

⁶¹ Nywebo mwabona, Paulo waka jisi mulimo mupati kwiinda boonse bamwi baapostolo bakabikkwa antoomwe. Bamwi babo bakali kukonzya kwaamba, “Ee, Nda keenda a Jesu.” Baa, muntu wakali mu kagwagwa wakeenda a Nguwe cindi Na kali waano. Pele Paulo waka Mu bona mu Musumpululu wa Mulilo Na kamana kufwa, kazikkwa, akutanta kuya ku Julu, a kubweeda a kwiita Paulo, mwabona, mwabona, mu lweendo kuselemukila ku Damasiko. Elyo wa kajisi mulimo mupati kwiinda Matayo, Marko, Luka, na kufumbwa wabo umwi. Wa kali kwiindilila kuli mbabo. Elyo wa kati, “Kutegwa Nta lisumpuli ono a kuti, ‘Lino, nywebo no balombwana tamu zyi cintu kujatikizya Ncico. Nda kabona Mwami *kumane* bubuke Bwakwe.’”

⁶² Ee, ba lati, “Twa keenda a Nguwe.” Ee, mbubonya bantu boonse mbo bakacita kumusanza mu Galilaya a Nazareta a kwiinda mu cisi okuya. Boonse bakeenda a Nguwe.

⁶³ Pele, nywebo mwabona, Paulo waka kanana a Nguwe a ku Mu bona mu ciimo eco Nca kabede Ka tanaba mu mubili wabuntu. Mwabona? Elyo Wa katuma Paulo mu ciimo eco, kuciindi Na kali mu Mumuni oyo. Wa katuma Paulo. Elyo—elyo Paulo waka Mu bona. Elyo wa kati, “Kutegwa Nta lisumpuli, kulimvwa aniini kuba atala loko kwiinda ndinywe bakwesu, kwaka pegwa kuli ndime mutumwa wa dyabulosi,” oyo umubamba kuzundidwe. Elyo wa kati, “Nda kamuyandaula Mwami ziindi zyoatatwe kuti acigwisye kuli ndime. Elyo Wa kati, ‘Saulo, na Paulo, luzyalu Lwangu lulazulila.’” Mpawo Paulo wakati, “Njoli kankaizya mu kulengauka kwangu, nkaambo cindi Nda kompama mpawo Ndili muyumu. Mwabona, Njoli kankaizya muli ncico!”

⁶⁴ Lino, sena mwa langisya? Lino, muntu oyo waka jisi mulimo mupati kwiinda umwi wabo oyo wakali mu muunda, Paulo, mulimo mupati maningi wa boonse babo, oyo waka bona Jesu mu Musumpululu wa Mulilo, a kumutuma kucita eco nca kacita, alimwi waka simpikizigwa a Leza nguwenya, a Nguzu nzyoonya, a zitondezyo a zigambyo kwiindilila mubuzyo uli oonse; alimwi wakali mucete loko cakuti wa kajisi biyo bbaki lyomwe, kakambauka ku cikama ca bantu abo bakali noonga banonkola meso abo, alimwi bamwi babo bakali basimamilioni. Elyo nekubaboobo Paulo waka jisi bbaki lyomwe. Wa kati, “Amu

muletele eelyo bbaki, kuya butontola atala awa.” Wa kali mu cisi ca cilundu. Wa kajisi buyo bbaki lyomwe.

⁶⁵ Elyo Demasi, ku muntu waka jisi bwiime bwaatala, ciimo caatala cibotu, bayiide kabotu, bayiide, a muntu movubi oyo waka jisi kucinca kunji kwa zisani, “Oyo mulombwana, wakali cintucimwi cilubide kuli nguwe. Wa kajisi balongwe banji bakalino nonkola meso aabo akwaapa kuli nguwe, elyo nekubaboobo wa kali mucete loko cakuti wa kajisi bbaki lyomwe. Cintucimwi cakali lubide kuli Paulo.”

⁶⁶ Oh, nywebo mulizi, oyo muuya tauzwi mu inyika, ba cijisi nzila eyo. Mali kutali Leza. Kuli buyo Leza omwe. Mwabona? Pele bantu bayeeya kuti ujisi mulimo mupati cakuti weelede kuba *ceeci* coonse a *ceeci* coonse, azintu ezyo zyonse zipati loko, a zikolo zipati a mupati *niini-a-niini*. Leza tabeleki a zintu ezyo. Na, nokuceya, oyo wakali muyeeyo wangu. Leza ubeleka a mugame. Ta ka tusala kuunka kucita zintu zili boobo.

⁶⁷ Pele Paulo, a bbaki lyomwe, elyo ula ambila Timoteo awa ku lileta kuli nguwe nkaambo lyakali kuya butontola kutala okuya. Uh-huh. I muntu waka jisi mulimo oyo waka kambauka ku makumi a zyuulu ezyo Paulo nzyaka cita, a mulimo wakali kukonzya kucita misyobo yoonse ya maleele, a kubona Jesu mu Musumpululu wa Mulilo, waka mutuma, elyo nekubaboobo wa kajisi bbaki lyomwe. Demasi wakati, “Mulombwana mbuli oyo,” wa kamu futatila.

⁶⁸ Lino, cindi nakali okuno kakambauka kutozya ku Troas, tu jana kuti kwakali muntu kutala okuya wakali mufuzi. Elyo wa kali mumpelenge. Elyo wa kasulaika Bunakristo. Elyo wa kacita zintuzyonse kuli Paulo nzyakali kukonzya kumu citila, kamusowela mu ntolongo, alimwi cons- . . . naba Paulo waka mucenjezya Timoteo ku cintu nciconya, “Langilila oyo mulombwana.” Elyo ngooyu Demasi! O Leza, lekelala bantu kuti bacimvwe! Ngooyu wakaliimvwi Demas mumsi lya muntu wakaumwa kuba moofu, nkambo kakukazyanya a nguwe. Lino, nobakambausi ba Mbungano ya Kristo, amusame mabbaki anu eno. Nda kajisi omwe waka ndaambila ciindi cimwi, kati, “Nduume ndofwaale! Konduuma ndofwaale! Uli jisi Muuya Uusalala, konduuma ndofwaale.”

Nda kati, “Yebo uli moofu kale.” Mwabona?

⁶⁹ Lino, nkaambonzi Paulo takauma mufuzi kuti aofwaale? Oyo musyobo nguonya wa muuya uli aa bantu bayeeya ceeco, ncintu nciconya cakali ali Demasi. Ii muntu wakali kukonzya kuuma muntu moofu, ku kukazyanya a nguwe, elyo mpawo kunyona a kulekela mufuzi kuti anyonganye mulimo wakwe mu munzi. Taakwe kuzumbauzya Demasi wakati, “Wa, wa kamana, wa kasweekelwa zipigo zyakwe zyonse. Wa—wa kasweekelwa zipigo zya kuuma kofwaala.”

⁷⁰ Sena mwakabona oyo muuya mbo ucipona, akuti, “Wa kamana, mukwesu”? Oh! Ci—ci lainka buyo atala lya mutwe wa bantu. Ta ba cimvwisiyi buyo, kwamana kuliko kuli ncico. Mwabona? Taba konzyi kucibona buyo. Mwabona? Ta bamvwisiyi.

⁷¹ Lino Demasi . . . takauma oyo muntu kuti aofwaale nkaambo wa kali kuyanda kucita. Sa Jesu takaamba kuti, “Nse citi cintu kusikila Taata wa Ndi tondezya lutaanzi”? Sa tii ndaka mwaambila myaka yakainda, a baama beni bakali lede, kabafwa, elyo akuti, “Bill, ino ncinzi cijanwa cangu kuli ndime?” Nse kakonzya kwaamba cintu cita Leza wa kaamba boobo lutaanzi. Alimwi eco nco cakacitika. Muntu takonzyi, muntu ngu sikukakilwa kuzwa kukutalika. Walo mwiiminizi biyo kuli oyo Leza ngwa belekelamo, alimwi Leza ubeleka luyando Lwakwe Mwini. Pele cindi mwabona bantu aba babotu loko abo lyoonse bajisi *eci* a *eco* a *cimbi*, ncibotu wa tantamuka kuzwa kuli ncico. Mwabona? Jesu Mwini taka cita ceeco. Wa kati, “Ndi beleka buyo mbuli Taata mbwa beleka. Ula Ndi tondezya cakucita elyo mpawo Nda unka kuyo cicitu. Nse konzyi kucita cimbi . . . kufumbwa cintu kunze lya ceeco.”

⁷² Elyo ngooyu Demasi wakabona Paulo, muntu waka jisi mulimo mbuli oyo, elyo nekubaboobo wakali mucete loko cakuti waka jisi biyo bbaki lyomwe, alimwi wakali kuyanda Timoteo ku cileta kuli nguwe. Bbaki lyomwe! Pele, Paulo waka bamba mukozyanyo mbuli Kristo mbwa kabede, Wa kajisi bbaki lyomwe. Mpawo nkaambonzi buvubi a mali manji a zintu nco zyaamba maningi ku bantu sunu? Amubone eno. Elyo wa kajisi nguzu mane, kufumbwa muntu oyo waka iimpene kuli eco nca kakambauka, wa kanyona a kwaamba, “Muyo ofwaala kwa ciindi ceelede.” Elyo muntu wakali moofu.

⁷³ Elyo mpaawa kwakali mufuzi, kacita ziindi zili kkumi kuli nguwe ezyo muntu oyo nzyakacita, elyo nekubaboobo kuta subulwa. Demasi kweelede kuti waka yeeya, “Ee, mwabona, mulombwana mudaala wakamana eno. Wa kasweekelwa mulimo wakwe.” Peepe, peepe, ta kasweekeledwe mulimo wakwe, pee nconzyo. Leza taciti zintu mbuli ezyo. Leza tali sikupa muna India. Inzya. Amubone eno.

⁷⁴ Paulo wakali cintucimwi mu bweende mbuli Eliya. Eliya musinsimi wakatanta atala lya mulundu kwiinda ku kutumwa kwa Leza, a kwiitila mulilo kuwa kuzwa ku Julu, nkabela wa kawa. Elyo wa kaitila maanzi, nkabela aka boola. Elyo mpawo wa kalaililwa a mulumbe wa Leza a kujaya bapaizi bali myaanda yone, kagonka mitwe yabo, kuba lekela kupumbulika kuselemuka cilundu; elyo mpawo kucija ku kukongwa kwa ii—ii mwanakazi, mwanakazi muniini umwi sikuupaupa, na, waa kali muhedeni. Jezebele, oyo mwanakazi muniini wakali mbaakani ku kabeela koonse, waa kali nguwe waka cicitya. Kaboneka mbuli kuti naka mujata lutaanzi. Pele Leza uli jisi nzila zya

kucita zintu, alimwi balanda Bakwe luzutu bakonzya kubeleka kweendelana ikuti na ula beleka kweendelana ku luyando lwa Leza.

⁷⁵ Sena tamu bwene, beenzuma, mweelede kweenda kweendelana a nzila ya Leza ya kweenda. Nziindi zyangaye Ne kakkala mu kkanso ya bakwesu, a nzila mbo Ndi yanda kweenda okuya a kusukana maanza abo a kwaamba kuti, “Bakwesu, ta cibambi lwaandano luli loonse, atube buyo babunyina antoomwe.” Mbobuti mbo Ndi konzya kucita eco a kubamba kutumwa kwangu, “Kambauka Ijwi”? Tandi yandi kucita eco.

⁷⁶ Nda kaima akati ka bakutausi, a kwaamba, “Mukwesu Branham, ba anti bali okuno. Ndi lizi kuti uli musinsimi wakatumwa kwa Leza. Koya okuya a kuboomezya kukubona kwakwe.” Ni Nda konzya, Ne cicita. Nse konzyi kucicita mane Wa ndaambila ku cicita. Mwabona? Taakwe umwi wakali kukonzya kucicita. Eliya taka konzya kucicita, taakwe muntu umbi wakali kukonzya kucicita.

⁷⁷ Lino tu jana kuti oyo Paulo... Demasi kakambauka antomwe a Paulo, wakabona Paulo kabona mulema ka kkede alya, a kuti, “Nda ku ziba kuba a lusyomo lwa kuponesegwa. Koimikila aa matende aako! Jesu Kristo wa kuponya.” Wa kamubona kaponya baciswa, elyo nekubaboobo wa kasiya mweenzinyina wakacisidwe Thofilasi.

⁷⁸ “Paulo waka maninwa mulimo wakwe.” Eco nce ncico Demasi cakayeeya. “Nkaambonzi nca taka, ikuti na kajisi cipego ca kuponya, nkaambonzi ncata kainka kutala okuya kuyo ponya oyo mulongwe wamunsi waka mwiiminina cakusyomeka loko? Wa kati, ‘Nda musiya okuya kacisidwe. Alimwi Nse jisi bbaki, alimwi Ndi yanda kuti ukandiletele eelyo bbaki. Elyo kocenjela, oyo mufuzi, wa kanyonganya oyo muswaangano mu munzi. Nda kacita kuzwa mu dolopo. Wa kandi bikka mu ntolongo.’” Nda yeeyela Demasi wakati, “Ino musyobo nzi wa mukambausi oyu mbwakaba?” Huh?

⁷⁹ Elyo, mukwesu, ba jisi minji eyo myuuya yaba Demasi mu inyika sunu. Ta bazi coonse mbo cibede. Mwabona? Ta kuyandikani kusola ku cipandulula kuli mbabo, nkaambo taba kacijani nekuba. Mwabona? Mwabona? Muzike wa Kristo utobela Ndyato zya maulu.

⁸⁰ Umwi wa bamadaikona okuno, Nse zyi na mpali okuno sunumasiku nape, ngu Tony Zabel. Ula janika okuno kanji. Elyo wa kaboola kuli ndime elyo wa kati kuno kutali ciindi cilamfu cainda katana sika... kuboola okuno, wa kati—wa kati, “Nda—Nda kajisi ciloto, ciloto cigambya.” Wa kati, “Nda—Nda kalota kuti Nda kali kusola kujana nzila yangu kuya butanta kutozya ku Julu.” Wa kati, “Nda kabona muntu kaboola kasamide cikobela cisiya alimwi wakali i—i—i kubala bbuku.” Elyo kati,

“Nda—Nda kasika ku mwaalumi oyu, nkabela Nda kamubuzya kuti, ‘Njiili nzila iyaku Julu?’ Elyo wa kati, ‘Buzya muntu uli kumbele lyangu.’” Elyo oyo wakali i—i mweembezi wa mbungano ngwa kaunkide.

⁸¹ Wa kainka kumbele mbicaana alimwi waka swaanganya muntu umbi, wakali samide cikobela cisiya alimwi wakali kwiimba nyimbo, kayabuya. Alimwi oyo wakali mweembeli umbi. Bobilo beembeli bakali balongwe bangu cigaminina. Alimwi wa kati. . . Alimwi muntu mubotu. Elyo wa kati, “‘Njiili nzila Nje konzya kusika atala lya mulundu awa?’ Wa kati, ‘Langa awa.’ Kati, ‘Bona, wiimvwi okuya atala, oyo mulombwana muniini na?’ Nda kati, ‘Iiyi.’” Kati, “Ngooyo wakaliimvwi mulombwana usamide ovolosi, kasamide ngowani niini ya sikweembela ng’ombe.” [Kabeela katakwe cintu aa teepu—Mul.]

⁸² Muntu umwi wakati, kunselelo mu Kentucky, kati, kaambaula kujatikizya ndime kunselelo kuya, kati, “Oyo mulombwana uboneka mbuli cintu cili coonse pele mukambausi.” Inga waboneka mbuli mulimi na cintucimwi, pele—pele, nywebo mulizi, ta ciboneki.

⁸³ Elyo wakati ndakali ndime ndakaimvwi atala alya. Elyo wa—wa katanta mane wa kasika kuli ndime, a kuti Nda kamujata ku kuboko a kumu sololela atala mane Nda kasika atala lya cilundu. Elyo kwakali nkanda ya kwiinda mo. Elyo Nda kati, “Tony, Nde elede ku kuleka awa nkabela weelede kweenda imwi eyi olikke.”

Wa kati, “Mukwesu Branham, ino inga Nda citanzi kuzwida awa?”

⁸⁴ Kati Nda kati, “Boola okuno, Tony, kolanga kunselelo okuya. Ula ibona mikondo itakwe cintu cita Bulowa muli njiyo?” Nda kati, “Eco Nce katobela ciindi coonse. Kukkala buyo ali Ceeco.” Eco nce cintu cilikke Nce zyi kutondeka muntu; kutali ku kansiyansiya na kunyanyamukwa kwa musyobo umwi, pele kuli ezyo Ndyato zyamaulu zyakazwide malowa zyaka sololela ku Bbaibbele, Bulowa bwa Jesu Kristo.

⁸⁵ Lino, obo muntu mbwa kalimvwa, muntu waka jisi beenzinyina banji basimamilioni, a bbaki lyomwe. Ii muntu oyo wakali. . . kajisi nguzu zya kuuma muntu moofu, a kulekela muntu kumutanda kuzwa mu dolopo. Kwiina cintu ncakacita kujatikizya ncico, wakabuka akuzwa. Kakombela baciswa nkabela waka siide mweenzinyina kacisidwe. Elyo Demasi waka musiya. Boonse bamwi baka musiya. Boonse baka musiya. Paulo wakati, “Bantu boonse baka ndisiya.” Umwi aumwi wabo waka musiya.

⁸⁶ Nda amba ceeci. Cindi muntu aima bwini ku Ijwi, kutali buyo mu muswaangano omwe, pele mu muswaangano aumwi, cindi muntu aima bwini ku Ijwi, ciindi ciyo boola nobayo musiya. Mbombubo. Ba kacicita. Ba kacicita ku Mwami wesu. Bayo musiya cindi na iminina Bwini. “Bantu boonse baka

ndisiya.” Elyo eno ino muyeeya nzi eco Demasi a bamwi babo bantu ncoba kayeeya cindi toonse notuzyi, abo bazi Lugwalo, kuti Luka wakali dokotela, elyo Paulo, kufumbwa nkwa kaunka, kabweza oyu dokotela a nguwe? Elyo kukambauka kuponesegwa kwa Buleza, a kusiya mweenzinyina kacisidwe. Mucete loko, wa kajisi bbaki lyomwe. Alimwi kulekela muntu kumutanda kuzwa mu dolopo, kakuli wa kakonzya kuuma muntu kuti aofwaale. Mwabona, ba kayeeya kuti muntu wa kali manide. Pele takali obo! Wa kali moonya mu Ndyato ncobeni zyamaulu zyakazwide malowa. Wa kali kutobela. Nda syoma mula mvwisya. Wa kati, “Boonse bantu baka ndisiya.”

⁸⁷ Demasi, kayanda eyi inyika iliko, mpuwo ya bantu. “Wabona, Omwiyi Demasi. Ndi lizi kuti ujisi yako Ph.!”

⁸⁸ Oh, masimpe, bala ciyanda eco. Jesu wakati, “Obo mbo muyanda kwiimikila mu masinagogi, a kwiitwa kuti ‘Rabi,’ abumwi bumbi.” Kati, “Yebo utambula buyo lunyonyooko lunji.” Mwabona?

⁸⁹ Lino, tu lizi cindi niba kabona dokotela oyu kumutobela, na a nguwe, elyo Paulo wakatola Luka, kati, wa kati—kati awa, “Luka walo—Luka walo alikke nguwa taka tantamuka. Alimwi Luka walo—walo uli kabotu kuli nguwe. Pele, Luka ula zwidilila kuli nguwe. Walo uyanda Luka ku mulimo wakwe.” Elyo oyu dokotela wakali kutobela muntu koonse nkwa kaunka, a kukambauka kuponesegwa kwa Buleza. Elyo muntu wakambauka kuponesegwa kwa Buleza inga waponya basunkuta a kubusya bafu, a zintuzyonse zimbi, akubona zilengaano zyanguzu, a kukanana zintu zyakali kuyo citika, a kusiya mubelesinyina kacisidwe. Elyo naka konzya kuba a mamilioni amadollar a kuyaka mayake akali kutola makumi azyuulu zya madollar, a zikolo zipati azintu mbuli ezyo, nkabela akwalo taka jisi cita bbaki lyomwe lya kusama.

⁹⁰ Demasi wakati, “Nse kobeleka antomwe a mulombwana mbuli oyo. Uli buyo. . . Uli mu musela waansi iwa bantu. Njo unka kutala a bakwesu batubungwe. Ndiyo inka kutala oko Nkwe yooba muntuumwi.” Ikuti na cakali cintu cili boobo, Ndi yanda kweenda, elyo mpoonya buyo Baxter amanizya, mwabona, nkambo ka kusiya mulombwana oyo muniini mucete mu ciimo eco. Wa keelede kwiima muni lyakwe. Paulo wakali umwi waka musololela kuli Kristo. Pele, nywebo mwabona, tacikwe kuziba Muuya, mukuziba obo luyando lwa Leza mbo lubede, mpawo kucita luyando lwa Leza. Mwabona? Lino, pele ngooyo wa kamusiya mu ciimo eco. Ka musiya! Bantu boonse bakali musiide.

⁹¹ Obo Mbwe yeeya ceeco! Obo mulanda mbwaya kwiima cakusyomeka ku Ijwi, ciindi ciciza, amuyeeye buyo, bantu baya ku musiya. Lino tu yanda kuuma eco kwa maminiti masyoonto, elyo Nse komukkazika kwa ciindi cilamfu lino, nkaambo Ndi

yanda kuti mu cifumo cino. Lyoonse cindi mulanda wa Leza aima cakusyomeka ku Ijwi, boonse bala musiya. Elyo ci... Lino, amubweze buyo kufumbwa nko muyanda, kufumbwa ciindi mu Bbaibbele na mu makani aakale, kuti cindi muntu naka kkala ca bwini, takukwe makani obo mbwa kali ampuwo, cindi na kakkala cakusyomeka ku Ijwi, ciindi cakasika inyika ya bukombi niya kamusiya aku mugwisya. Lino, amu cibale buyo, ikuti na mwabweza Bbaibbele kuzwa ku Matalikilo kuya ku Bbuku lya Ciyubunuzyo, a kusala mu *Pre-Nicene Council* a kutalika kuyaansi ku *Nicene Fathers*, alimwi muntuonse, musalali onse, musinsimi onse, mulanda onse wabwini iwa Leza waka kkala a Ijwi, waka siigwa ku cintu cabupaizi a kusowegwa. Elyo Paulo wakali umwi wabo.

⁹² Elyo ikuti na kwaba umwi sunu, inga caba cintu nciconya. Bwalo mbwini ncobeni. We elede kuuma busena obo. Bweelede kuboola. Ba yeeya kuti muntu wakali kujisi mulimo mbuli oyo, weelede kuba a inyika nkonya kungsi lya caala cakwe. Ule elede, pele taba kasiki kusi lya caala cakwe. Mwabona? Alimwi muntu mbuli oyo inga tabikka mulimo, na inyika kungsi lya caala cakwe; inga waibikka kungsi lya caala ca Simalela wakwe, nkaambo ta liiminini awa alikke, walo wiminina Simalela wakwe.

⁹³ Nywebo mulizi, bantu basola kujana bulemu kuli umwi aumwi, elyo bala lemekana umwi aumwi, a kuubaula Leza mu kucita boobo. Mwabona? Tu sola kupanga bantu bapati akati kesu, alimwi kakuli tatuli bantu balemu a bantu baniini, toonse tuli bantu baniini. Kuli biyo Omwe mupati akati kesu, nkabela oyo ngu Mwami wesu. Mwabona? Elyo tupanga kabunga kesu kukomena boobo kwinda Leza, “i mbungano mpati iisalala ya *ceeci*, *eco*, na *cimbi*, mabbishopo aasalala,” a bamwi bambi. Kwiina zintu zili boobo mbuli ezyo. Oko nkulemeka kwa muntu. Kuli biyo Omwe uusalala, alimwi oyo ngu Leza. Elyo Muuya Uusalala, uuli ngu Leza, uli akati kesu. Ta tuli ndiswe abo basalala, walo Muuya Uusalala uli muli ndiswe. Ta cili... Cindi twa bona zintu kazicitwa, ta tuli ndiswe tucita, walo Muuya Uusalala. Jesu wakati, “Nseli Ndime uucita milimo, ngu Taata Wangu. Walo ukkala muli Ndime, alimwi Ngo Nguwe ucita milimo.” Elyo tali nguwe oyo—oyo ucicita. Yaa. Pele tula bajana balanda beni kwinda mu ziindi.

⁹⁴ Lino nceeci cintu nce Ndi yanda kubaanga nkubelesya kwa kaindi kasyoonto. Lino, kanji nciindi cili boobu mbuli ceeci cindi bantu niba kakkala cakusyomeka ku Ijwi a boonse bantu baka musiya kusikila Leza wabikka mu bukwabilizi bwa muntu oyo a kusamikwa musyini mulimo wakwe. Mbo mbubo. Ino nkumbulizigwa. Kuumbulizigwa kwesu kuyakwa mu cisyomezyo ca Ijwi lya Leza. Takukwe makani eco nyika ncoyaamba, eco inyika nco icita, obo tabuli bulangizi bwesu, tabu yakidwe muli ceeco inyika ncoicita.

⁹⁵ Ndi yeeya kuti lwiimbo olo ndubotu loko. Ni Nda konzya

kwiimba. Lyoonse ndakali kuyanda kwiimba. Mwabona? “Abo balindila aa Mwami, bayo bukulusya nguzu zyabo, bayo tanta mababa aabo mbuli sikwaze, bayo zuba a kuta katala, ikuti na beenda ta ba kawizuki; ndi yiisye, Mwami, ku lindila. Kondi yiisya, Mwami, kulindila ansi ku mazwi angu.” Nda ciyanda eco. “Elyo mu ciindi Cako Cini cibotu Uyo ingula kuyandisya kwangu; ndiyiisya kuta yaamina kuli eco bamwi ncoba cita, pele kulindila buyo mu mupailo ku bwiinguzi kuzwa kuli Nduwe.” Nce ncico. Oyo ngo mulanda wini ulindila mbali ya Simalela wakwe, mukuziba ceeci, kuti Magwalo taakonzyi kukakilwa kakutakwe kulanganya eco cicitika. I Lugwalo lweelede kwiima bwini. Mu ciindi cili obo, nde ndilyo Leza kanji nanjila kubagwasya.

⁹⁶ Atu lange kuli Eliya cindi na kasiigwa. Nkaambonzi? Nkaambo wa kakkala cakusyomeka ku Ijwi. Wa kati, “Boonse bantu baka ndisiya.” Elyo wa katandwa kuzwa ku nsangano, kuzwa ku kabunga, kuzwa akwalo ku kabunga ka cisi, ika mbungano yacisi iya Israyeli, mupaizi a boonse baka mu tandila anze, alimwi taka jisi noliba bbaki mbuli Paulo, pele kabeela kaniini kacikutu cambelele, na, ikkutu lya kamuvumbide, a kukkala atala lya mulundu nkabela waka saninwa ku bayuni. Iiyi, munene. Nkaambonzi? Nkambo ka Ijwi lya Leza, nkaambo wa kali kasimpe kuli MBUBOBU MBWAAMBA I MWAMI. Lino boonse bakainda kuba basyaasunu. I muka muleli wacisi, Jezebele, waka jisi mafashioni onse a zintu. Elyo bapaizi baka zumina kuli ncico abumwi nkabela boonse bakambausi abamwi, ba kavwaana muli ncico. Pele kutali Eliya, wa kakkala cakusyomeka ku Ijwi eelyo. Elyo ku cintu cili boobo wa kasiigwa, mane wa koompolola, “Mwami, Ndime omwe biyo uusyeeede, alimwi akwalo bala yandaula buumi bwangu.”

⁹⁷ Pele Leza waka mupa kuumbulizigwa kumwi, kati, “Ndi jisi bali zyuulu zili ciloba baciliko kumusanza okuya.”

⁹⁸ Mwabona, Nse syomi kuti Eliya wakalimvwa kulikankaizya kujatikizya ceeco, kuti wa kali omwe luzutu, pele Ndi yeeya kuti wa kasiigwa buyo maningi. Ciindi coonse nakali kunga wakainka kutala ku mupaizi kuyo bamba muswaangano, bakali kunga ba mutanda. Wa kali kunga waselemuka awa, “Kozwa awa, yebo sikwiindilizya! Kozwa awa! Koya kacite *ceeci!*” Ca katondezya cindi Elisha naka boola ambali, sikuzwidilila wakwe. Ee, ino bakacita nzi? Balo nokuba... Mulombwana mukubusywi waka jisi lubuwa amutwe, alimwi baka tumide bana babo baniini kuyo bafubaazya kuti bamadaala “basilweeno.” kati bobilo babo baka langanisigwa kuba basilweeno, kati, “Syalubala mudaala! Syalubala, nkaambonzi toinka kujulu mbuli Eliya mbwa cita?” Teeba kasyoma kuti wa kainka kujulu. Uh-huh. Mwabona? Kayeeya buyo kuti wa kali mu cikama ca basilweeno. Pele bakali kasimpe ku Ijwi, a mulimo waka simpikizigwa. Eliya wakaima. Ncibotu.

⁹⁹ Danieli wakabweza kwiima kwini. Mulizi oko Nkwe jana eco muli Danieli 12, na Danieli 9, Nda syoma cili obo. Cindi mwa. . . Daniele wakabweza ntaamo ini ya Ijwi. Ncinzi cakacitika kuli nguwe? Cindi na kali muntu wa janza lyalulyo ku mwaami, pele wa kabweza kwiima kwini kwa Ijwi, elyo wakatandwa a kusowelwa mu bulyango bwa balavu. Ii muntu wa Leza kaimvwi cabwini ku Ijwi!

¹⁰⁰ I bana ba Hebrayo baka kkala bwini ku Ijwi, kungsi lya kwaambilizya kwa mwaami kuti, “kufumbwa oyo utakafugamini eco cikozyanyo cindi kalumbu kalila a myeembo yasiba, azimwi, kufumbwa oyo utaka kotamini cikozyanyo cesu uyo sowelwa mu bbila lya mulilo,” elyo baka futatila cinkozya cabo. Elyo ku-. . .Balo, kutalanganya mbo bakabula mpuwo, kutalanganya obo mbo bakatandwa kuzwa mu bukkale bwa abantu, baka kkala cabwini ku Ijwi. Nda ciyanda eco.

¹⁰¹ Jakobo, uumbi. Wa kajisi i. . . wakali kule kuzwa ku muunzi kwa ciindi cilamfu, alimwi wa kajisi kwiitwa kuunka ku ng’anda kuyo bona bantu bakwe. Elyo wa kali mu lweendo lwakwe, kusyomeka ku kwiitwa kwakwe, kuba bwini ku kusololela kwakwe. Wa kajisi zintu zibotu okuya, pele Leza wakatalika kubeleka a nguwe kuya ku muunzi. Elyo, mu lweendo lwakwe kuya ku muunzi, waka sowelwa akati ka masena obilo aamapenzi. Mukaintu wakwe a bana ku lubazu olu; elyo munyina wakasulaika, Esau, kaboola okuno a mpi kuzo muswaana. Elyo wa kaima ku kalonga kaniini, kalonga kaku Penieli okuya, elyo awa wa kaliimvwi. Elyo ino nciimo! Esau, kamusulaika, kaboola a mpi kuzo muswaana, alimwi ngooyu wakali mukaintu wakwe, bamakaintu bobilo a bana boonse ku lubazu olu lwa kalonga, nkabela wa kajatwa mu busena busyanikide. Nkaambonzi? Nkaambo na kakkala mu nyika yakwe ni caka lulema. Pele wa kajisi kwiitwa, Ijwi lya Leza lyaka mwiita ku nyika yakwe yakuzyalilwa. Aleluya! Leza alongezye muntu. Wa kacinca, awaloo. Iiyi, munene.

¹⁰² Jesu, kasyomeka ku Ijwi lya Taata, “Ndi cita buyo eco Taata ncaamba. Kuli lembedwe, ‘I muntu taka poneni ku cinkwa cilikke, pele ku Ijwi lyoonse eelyo lizwa ku mulomo wa Leza.’”

Jesu, cakusyomeka lyonse ku Ijwi elyo, ca kasika cindi Na kasweekelwa balongwe boonse Mba kajisi. Boonse babo baka Mu siya a kuzwa. Boonse babo. Elyo bantu baka Mu bona kasabulwa, kasekwa, baka sweekelwa kaanzambwene muli Nguwe. “Mbobuti muntu oyo ukonzya kukanana ku muntu uufwide mu cuumbwe a kumubusya, mbobuti muntu wakalikukonzya kusinsima cicitika mbuli mbo kweelede akutasola. . .kutasola kukakilwa; akukkala mu kkota abusyu bwakwe kabusweka malowa kuzwa kukumozolwa cilezu, a kuswidwa kwa mukolwi kulolomoka kuli basilumamba kakuloka kuzwa ku busyu Bwakwe, a kasila ku mutwe Wakwe, a ku Mu uma aa mutwe kubelesya kasamu, a kwaamba

kuti, ‘Sinsima a ku twaambila oyo wa Kuuma, nkabela tuyo cisyoma?’” Ee, basikwiiya bakazwaa kweenda, kati, “Aah!”

¹⁰³ Mwabona, bala luba loba obo cakufwambaana loko eco Leza nca kacita! Obo Musa mbwa kaamba ku Lwizi Luslala, cindi nakaima kuya a kwaamba, “Leza wakacita malele mapati mabotu loko, mucili basikusunda loko cakuti tamuzyi kuti Učili Leza?” Wa kaunka kunselelo okuya nkabela wa kauma masi, wa—wa kabikka lutuko aa inyika. Wa kaleta bacula, intabwa, nzinini, zintu zyoonse, alimwi i—i kubbotoka oko kwakajaya mwana mutaanzi wini, elyo angelo wa lufu wakaandulula mu cisi, elyo nekubaboobo abo bantu teebe kali kuyanda ku mutobela aa Lwizi Luslala. Mbo cili cakufwambaana, mpuwo yako mboya beda buyo... Cindi niba kabona aya masumo makali aa bantu ali zyuulu zili mwaanda ka baboola mbuli boobo, na ndiza, inzya, na ndiza bantu bali mamilioni kababoola, a kuvuuma kwa nkalaki a lusuko kauluka, ba kaleka buyo a kuwa kujoka, “Elyo, Musa, tweeleda katu fwide kale okuya.” Mwabona? Leza wakati Wa kabalekela kufwa mu nkanda nkambo ka kutasyoma. “Musa, mulimo wako wazakala, kwa mana. To cijsi pe.” Mwabona, taba mvwisyi. Taba cimvwisyi.

¹⁰⁴ Elyo lino cintu nciconya cakaliko cindi Jesu, Rabi mukubusyi na Mwiiyi, na Musinsimi waku Galilaya, cindi Na kali kucita malele ayo onse a zintu, “Mbobuti Mbwa kakonzya kusola kwiima a kubikkwa mujulu a cintu cili boobo mbuli eco? Mbobuti Mbwa kakonzya kulekela muntu ku Mwaanga a nketani, cindi Na kakonzya kumwaya caando kuzwa ku cuumbwe a kubusya muntu uufwide kuzwa mu Butamani? Mbobuti Mbwa kakonzya kucicita, kakuli Wa kali kukonzya kwaambaula ku mwana wa mukamufu waka fwide a kumubusya kupona alubo; a Lazaro, kafwide a kubola mu cuumbwe, a kumu gusya? Mbobuti Mbwa konzya kwiima a kwaamba, ‘Ndime Bubuke a Buumi. Oyo usyoma muli Ndime nekubakuti wakali fwide kwalo uyo pona. Kufumbwa muntu uupona a kusyoma muli Ndime ta kafwi pe.’ Elyo kwiimikila akwaangwa mu zyaanzyo a kuswidwa ku busyu, akuta bbamuna mulomo Wakwe?” I basikwiiya, “Wa kasweekelwa mulimo Wakwe.” Inzya, eyo nje nzila mbo cuunka. Leza, eyi inyika ya bacete!

¹⁰⁵ Noiba mbungano Yakwe, bali kkumi ababili Mba kaboteledwe aku baambila zintuzyonse, aku bayanda, ba ka Mu futatila. Omwe biyo wakaima munsu Lyakwe, oyo wakali muntu Johane. Nkoonya ku oora cindi zintuzyonse nizya kamana, a bulangizi boonse bwakali manide, mpawo Wa kalaangidwe, akutolwa okuya a kusabulwa akuswidwa mate, akubikka sule Lyakwe ku i . . . Muku taziba kuti eco cakazulizya Magwalo.

¹⁰⁶ Nkaambonzi, sena tamuzi kuti zintu zicitika sunu zili mukuzulizya Magwalo mbubonya mbuli mbo kweelede? Nkaambonzi bantu ncobanga baamba zintu ezi? Nkaambonzi otu tubungwe ncutwa kalala kapati? Nkaambonzi bacita ceeco?

Kuli lembedwe mu Magwalo bayo cicita. Ba keenda moonya muli ncico a kucicita lwabo, boofu, kaba tazi kuti bala cicita. Muyeeya kuti Judasi wakalizi kuti wakali kusobana cibeela ca Judasi? Muyeeya kuti Farao wakalizi kuti wakali kusobana cibeela, cindi Leza naka mubusya ku bukanze obo? Muyeeya kuti Esau naka cita zintu nzya kacita? Nee ncobeni. Kati, “Bali jisi meso nkabela taba konzyi kubona, matwi a kutakonzya kumvwa.” Pele amulangilile Lugwalo, kuvungulula buyo. Mwabona? Tuli ku ciindi camamanino, ceelede kuba nzila eyi.

¹⁰⁷ Lino, mbungano Yakwe yaka Mu siya. Bantu boonse a bulenge baka Mu siya. Amwaambaule kujatikizya muntuumwi waka siigwa, Paulo taka siidwe nokuceya kuli ceeco Nca kajisi. Abwalo bulenge mbubonya obo Mbwa kalenga bwakali ku Mu siya. I mweezi a nyenyeezi a zuba, a zintuzyonse, kazi ofwaala. Muntu, Leza, bulenge a zintuzyonse zyaka Mu siya, taakwe cintu cakaimvwi alya, Wa kafwa alikke. Sa Wa kasweekelwa mulimo Wakwe? Wa kali kuzulizya mulimo Wakwe, kutali kuuswekelewa. Oko kwiinka a nguwo. Eco nce cintu citola busena. Eco ceelede kuunka a ncico.

¹⁰⁸ Lino, zintuzyonse zyaka Mu siya. Pele cakali ciindi eci cakuti Leza waka njila aa cilao, nkaambo kufumbwa muntu oyo uuzi Ijwi liyo kkala a Ijwi, mukuziba kuti Ijwi ngu Leza. Mwabona? Elyo Ijwi lyelede kulivungulula Lini. I Ijwi litakakilwi lyelede kulivungulula Lini. Ci leelede, mu ncililano, nkaambo Ijwi ngu Leza. Elyo ikuti na Lya kabeleka ali bamwi boonse muciiindi ca bukkalo, Liyo beleka nzila njionya ndyoonya lino, nkaambo Ngu Leza. Muta lubi eco. Nkambo Jesu wakalizi kuti Walo mukuba buzule bwa Ijwi, Ta kali buyo Musinsimi, Wa kali Leza Mwini. Wa kali Ijwi. Ako nkekaambo kutali biyo muntu kuti waka Mu siya, pele abwalo bulenge bwaka Mu siya. I bulenge boonse bwaka Mu siya, zintuzyonse, nyenyeezi, mweezi, alimwi taakwe mumuni cindi Na kafwa. Zintuzyonse zyaka Mu siya, mwabona, nkaambo Wa kali Cilenga wa zintu zyoonse. “Wa kali mu inyika, nkabela inyika yakalengwa aa Nguwe, nkabela inyika tiyaka Mu ziba.” Mwabona? Wa kali Cilenga wa zintu zyoonse. Zintu zyoonse! Lino, cintu luzutu, eco nco. . . Ta tulengi pele kusola kusanidula, alimwi abo mbo tusandula mbe mbabo basaandila akweenda kuzwa. Mwabona? Ciindi cilasika ca Ijwi Lini kulitondezya kasimpe, ceelede kuba boobo. Lino, amuyeeye buyo, mpawo nce ciindi Leza na njila aa cilao.

¹⁰⁹ Elyo mu buumi bwa Mwami wesu Jesu, milimo yanguzu eyo Nja kacita mu mwaka mutanzi a myeezi ili cisambomwe ya buumi Bwakwe, oh, obo Mbwa kali Muntu singuzu! Taakwe cintu cakali mbuli Nguwe aa nyika, kwiina kuzwida eelyo, kwiina nokuyooba cakumana. Pele ncinzi cakacitika? Wa kajana kusabulwa kunji kwiinda kumwi, boonse bamwi babo baka bikka antoomwe. Kasabulwa ku bulenge a kusabulwa kwiinda ku bulenge, wakasabulwa kwiinda ku zintu zyoonse, nkaambo

cakali mu ciimo cakasandulwa sandulwa. Ako nke kaambo myoyo ya bantu kiisabula mulanda wini wa Leza, nkaambo kwakasandulwa sandulwa. Bulenge bwasantulwa sandulwa, ako nke kaambo.

¹¹⁰ Ikuti na bulenge mbubotu mbuli mbo bwakabede, mu kusandulwa sandulwa, ino ciyooba buti cindi casanduka kujoka ku luyando lwa Leza? Ikuti na nyika yazyala magirepu ayo atola baalumi bobilo kubabweza kusule lyabo, ino iyooba buti, alimwi eyo nyika yakasandulwa sandulwa, ino ciyooba buti cindi casanduka kujokela kuli Leza? Kristo ulaboola, lukula luyo syuuka mbuli duba. Lu yooba kusanduka. Elyo masena mayumu ayo pasuka kuzwa ku maanzi, nkabela nyika iyo sonsa a kusyuuka. Oh, eco ciyooba ciindi, alimwi myoyo ya bantu iyo sanduka mu bantu banaleza, abo bakeelede kubamba kusala kwabo lino, bayo pona mu busena obo. Ameni.

¹¹¹ “Eelyo oora lya mudima, akati ka kupanduka kwa myaala a milengalenga kiisiya,” wakaamba sikuyabila, “Mufutuli wangu wakakotama mutwe Wakwe a kufwa; cisitilizyo cijukide caka yubununa nzila ku lutangalo lwaku Julu a buzuba butagoli.” Wa kayadika kucita ceco kutegwa kakubambwa nzila kuli ndiswe. Nconzyo. Pele ino Leza wakacita nzi? Wa kali kasimpe ku Ijwi alimwi Wa ka bukata ciingano. Pele sena akali magolelo aa mulimo Wakwe? Sena mulimo Wakwe waka sanzigwa? Leza waka musamika musyini aa musyini mupati loko oyo wakasola kusamikwa musyini. Wa kausamika musyini aa cifumo ca Pasika, aa bubuke. Wa kasamika musyini aa mulimo wa Mwami wesu Jesu, Wa kabuka kuzwa ku bafu nkabela ula pona kwalyoonse. Ta kamanide nkaambo bantu boonse baka Mu siya, Wa kasamikwa musyini! Iiyi, munene. Iiyi, munene. Wa kasamikwa musyini nkaambo kakuti Wa kali, waka siigwa, alimwi We elede kucita ceeco cindi Na ka Mu busya kuzwa ku bafu.

¹¹² Mbubonya mbo kwakabede kuli Eliya. Twa mukanana ziindi zisyoonto zyainda. Eliya, oyo musinsimi mucete wakaindi wakamanide kakkede omuya mu nkanda, a kucita kusaninwa ku bayuni ncoba kali kumuletela. Elyo mubili wakwe muniini wakaindi walukanda lwakapuseme, wakali kuboneka kusalaluka, cinkuli ciniini ca mafuta kacilegalega ku lubazu lwakwe, malezu akwe kajoncomene, a mutwe antela walubala a kuumpwa kwazuba, kalemene, kaselemuka kweendela a musako mbuli *oyu*, pele kungsi kwini kwa moyo oyo wakaindi muniini kwa duntaana Muuya wa Leza. Cindi Leza nakabona mulanda Wakwe muniini mudaala kakatede kayabuya kumamanino, bantubonse kaba musisya, a zintuzyonse zimbi, sa Wa kamulekela? Wa katuma nkalaki ansi, kabweza mulanda Wakwe uukatede, “Yebo toelede akwalo kweenda mbuli Enoki mbwa kacita, Njo kutola buyo ku muunzi mu nkalaki.” Mbo mbubo. Wa kasamika mulimo wakwe a lweendo lwa nkalaki

kuya ku muunzi. Eco tacili cibyaabi loko, nywebo mulizi. Inzya. Iiyi, ta keelede kweenda ku muunzi, Wa katuma buyo nkalaki a kumu nyamuna nkaambo wakali katede. Nda cibotelwa eco. Ameni. Mulanda, muubauba, mudaala kakatede, Wa kamubweza aku mutola ku Muunzi.

¹¹³ Cakali ku ciindi eco Daniele nakaima cakusyomeka loko kuli Leza, cakuti wa kanjila . . . Ba kati, “Oyo muntu, nywebo mulizi, wa kali mulombwana mupati lumwi okuno mu bwami obu. Wa kaambilwa misyobo yoonse ya zintu. Alimwi wa kaleta basondi, wa kabayiisya zintu.” Alimwi bana Medesi-Persia anzila mbwa kacita. Pele kungsi lya bulelo bwa Dariasi, wakali Daniele oyo waka kkala cabwini kuli Leza. Wa kali Danieli waka kkala a Ijwi lya Leza akuta sanganya cili conse cimbi. Elyo wa kati, “Ee, mulimo wakwe wakali maninde, nkaambo Nda kacibona mu mutende wa mubusena, uyo sowelwa ku bulyango bwa balavu mu mazuba masyoonto.” Kuya ku ntolongo ya Masi mpati, na cintucimwi, nywebo mwabona. “Pele tuyo musowela mu bulyango bwa balavu.” Pele ino Leza wakacita nzi? Leza waka namatika mulimo Wakwe kubelesya kucinca moyo wa mwaami, oyo Dariasi wa katuma ku cisyobo conse, bantu ku nyika mboizulwa, kuti muntu aumwi weelede kuyoowa kuli Leza wa Daniele, nkaambo Wa kali Leza wakali kukonzya kuvuna. Ameni.

¹¹⁴ Aboobo, nywebo mwabona, nku ciindi eco bantu nibasiya bantu, balanda ba Leza abo bakkala cakusyomeka ku Ijwi, kuti Leza ula namatika mulimo wabo a ciindi cakusamikwa musyini.

¹¹⁵ Iiyi, bakali bana ba Hebrayo kungsi lya bulelo bwa Nebukadinezara, cindi niba taka fugama ku cinkozya. Ba kakkala cakusyomeka kuli Leza nkaambo Ijwi lya Leza lyakati, “Muta kotamini cikozyanyo cili coonse, ku kucikomba.” Ba kakkala cakusyomeka ku Ijwi. Elyo cakali mu pepa lya mubusena, mu makani, koonse kujatikizya ncico, kufumbwa mbo cakabede mu mazuba ayo. Ba kali jisi nzila zya kusabalanganya makani. Kutali mu mutende wa mubusena, nee nconzyo, kwaamba buyo eco kutegwa mujate muzeezo. Pele cakali mukati muya bakali kuyo baumpa mu bbila lya mulilo ziindi zili ciloba kupya. Ku mazuba kakutanaba eco, baka waala mu zibelesyo zyoonse kuti bajane bbila lya mulilo lipya loko cakuti cakali ziindi zili ciloba kupya, kuli sosela ziindi zili ciloba. Baa, ni waka basyukuta bonse, kuba mu mayaadi ali mwaanda kuli ndilyo. Pele baka njila moonya mu bbila lya mulilo, a kuzwa ncobeni kakutakwe akwalo kununka kumwi kwa mulilo aali mbabo. Elyo Nebukadinezara wakati, “Muntu aumwi oyo ukakilwi ku komba Leza oyu, amuleke bana bakwe anguwe bajayigwe, ng’anda yakwe yakapya akupanga cilundu cabuloko.” Mbo mbubo. Mwabona? Wa . . . Ba kajisi lubukululuyo lwa inyika mboizulwa nkaambo bakali kasimpe ku Ijwi. Eco nce cicitika. Iiyi, munene. Kkala cabwini ku Ijwi, iiyi, alimwi

kulapa bulumbu bubotu lyoonse.

¹¹⁶ Jakobo, ngo twaamba kaindi kainda. Ndi jisi zina lyakwe lilembedwe awa. Ngooyu mbwakabede, mukandu muniini, pele wa kali kukkala. Wa kayoowa Esau okuya. Ma, ma! Elyo wa kalizi kuti wakali kule kuzwa kuli Leza. Kali kule kuzwa kuli Leza myaka eyi yoonse, pele lyoonse wa kasola kukkala cakusyomeka ku Ijwi eelyo. Elyo mpaawa Leza waka mwiita a kumwaambila kuunka ku muunzi wakwe. Ngooyu wa kali moonya mu bulizi bwa mulimo, elyo ngooyu Esau a mpi. cakali ciindi eco na kacincwa zina lya *Jakobo*, “mumpelenge, silweeno,” Jakobo. . . “sibwami kumbele lya Leza,” cindi na kazwa cifumo citobela, a mulimo wakwe wakasamikwa musyini. Keenda nkoonya kubusena a kuswaana Esau, nkabela taka yanda lugwasyo kuzwa kuli nguwe. Ameni. Mbwini ku Ijwi. Eyo nje nzila Leza mbwa cita zintu, embo na? Ula—Ula cita zintu mu nzila Yakwe Mwini. Yaa.

¹¹⁷ Bunji bwa bakwesu bangu, bali mukuba a mpuwo mpati sunu akati ka babunyina babo batubungwe. Yebo waambaula buyo zina lyomwe, mulombe, alimwi cili mbuli mulilo, kuli koonse, mbo mbubo, yebo waamba zina eli limwi lya muntu oyu. Elyo, akwalo, cindi Mwami naka kanana kuli ndime kunselelo lya mulonga buzuba obo, kwa katalisya olo lubukulusyo ku inyika yoonse, kuzwa awo kwaboola boonse abo bavangeli bapati.

¹¹⁸ Ba kajokela ncobeni a banabokwabo, mwabona, otu tubungwe mo bakazwida. Ba kasika okuno akuba amuswaangano oyu, usangene a tubungwe, bala jokela muli ntuto alubo. Ba jisi luzyalo lunji, mazina mapati aa redio, mapepa, a zintu zyoonse. Bantu boonse bala ambaula kabotu kuli mbabo.

¹¹⁹ Pele bantu boonse baka ndisiya nkaambo Nda kabweza Ijwi lya bwini, a kwiima ku Ijwi. Nda kakkala mpoonya awa kuli ceeco Nca kaamba kuli ndime, kakambauka Ijwi, kutali silwiiyo lwa zikama zyatubungwe. “Kambauka Ijwi,” oko kwakali kutumwa kwangu, “amukkale a Ijwi.” Elyo, bakwesu, abo baswiilila kuli ceci aa teepu, Nda kali mulombwana mulemu cindi ni Nda kaboola akati kanu, kuponya buyo balwazi, kukanana zilengaano a kutondezya zintu. Pele cindi ni Nda kaunka kuyo mwaambila Bwini kujatikizya Ijwi, ino waka ndi futatila nzi? Sena mula mvwisya kuti nkuzulizya buyo eco Lugwalo nco lwa kaamba? Iiyi, cila cita nzila eyo. Lino Nse konzyi kunjila mu busena.

¹²⁰ Lugwalo lulasika ciindi coonse. Umwi wakasika buzuba bumwi, kati, “Mukwesu Branham, Nda kajisi kaanzambwene kapati muli nduwe, pele Nda kamvwa kwaamba kuti kabungwe kamwi ako nke Ndi zulilwa kakali kuwa.” Kati, “Nse cijisi kaanzambwene limbi muli nduwe pee lino, kuzwida lino.” Kati,

“Kwakali kutandila bakwesu bali makumi obilo abosanwe ba kabungwe kangu bakali kkede muli umwi wa miswaangano yako,” kati, “twa kasika kutala buyo—kasika kutala buyo akuzwa cindi nokaamba ceeco.”

¹²¹ Ee, bantu boonse baka ndisiya, pele kuli cintu comwe, Wa kaima munsu lyangu! . . . ? . . . Ta ndili, Tii ndaka unduluzya cilengaano ca Kujulu eco cakacitika kunselelo kuya ku mulonga. Nda kakkala cakusyomeka kuli ncico. Wa kali kasimpe kuli ndime. Ndila syoma muli Nguwe, buzubabumwi, Ta ndizi cindi, ku kusamikwa musyini wa mulimo wangu. Nda kakkala cabwini mbuli Mbwe kakonzya. Ta ndizyi mbo ciya kuba. Ta ndizyi cindi nciya kuba. Elyo Mebo, cindi buyo Na libambila, Mbwe bede. Nse kwe ndaba. Nda syoma Uyo samika musyini ku mulimo wangu oyu, waku ndilekela kubweza zisani zya Ijwi, a kusamika Nabwiinga Wakwe mu cikobela ca Ijwi, a ca bululami Bwakwe. Nda syoma Uyo ndisamika musyini, andi ime aa buzuba obo, kwaamba, “Amubone Kabelele wa Leza ugwisya cibi ca nyika.”

¹²² Kuli zilundu zinji zya kutanta, akuminwa, ciindicimwi cila yuma; pele Oyo utondeka kazila, ulizi ncobeni eco cibotu maningi. Uli zyi eco cibotu kapati. “Kubeleka kwanguzu kwa lweendo kuyo yabaala, cindi twa kusika kumamanino a musinzo.” Atu vwime ndyato ezyo zyamaulu zizwide malowa. Amuyeeye buyo, beenzuma, “I miseenga yaka sanzigwa mu mano aa Mweenzu oyo aa nkomwe ya Galilaya; a leelyo jwi lyakeendelezya maguwo makali, tali cikamvwigwi mu Judaya. Pele kazila ka oyo muna Galilaya sibukata, Ngwe tobena cakukkomana kapati sunu; a kubeleka canguzu kwa lweendo kuyo yabaala, cindi Nda kusika kumamanino a musinzo.”

¹²³ Mu cibeela eci citaanzi ca Lugwalo Ndwe bala, elyo Wa kandipa, Nda kali mwaalumi mukubusyi, musankwa buyo, nkeimvwi alya, makuko katonkomene, kaango kakadukumene, kuvula kwa, masusu asiya azingene. Elyo lino Nda ima aa ziwezo zidiimene, kuba a lubala aa mutwe, aamvwii, mudaala wa myaka iili makumi osanwe ayotatwe yakukomena. Pele Ngo mubotu loko mbuli mazuba mbwaya buya. Elyo tii Ndasisa ku mulungulwida Makani mabotu oonse aa Jesu Kristo. Elyo kuyanda kwa moyo wangu nku swaana Mbungano eyo Nja kafwida, kaisamide bululami bwa Bulowa Bwakwe Mwini, kasamide mu Ijwi Lyakwe a balulami ba Ijwi Lyakwe, nkambo Ijwi Lyakwe tali konzyi kukakilwa. Elyo nkikaako, Ndi lizi ikuti na Njo imikila ku Ijwi akuba bwini ku Ijwi, alimwi ikuti na Ijwi lyakkalilila muli ndime a Mbebo muli Nguwe, ku buzuba obo Njo kkomana kuti Nda kakkala cakusyomeka.

¹²⁴ Ta ndizi ciindi ciza nco cijisi, pele mwabona awo mpo tubede, embo na? Mwabona eco boonse nco baamba kuti, nokuba kuli bamwi balongwe besu, kati, “Baa, Mukwesu Branham waka mana do.” Mwabona? Inzya. “Koonse kwa kamana.” Mwabona?

“Aah, ta tumvwi kunji kucitwa.” Mwabona? Ee, tu...Taba mvwisi buyo, kwa mana, muta cimvwi buyo. Mwabona?

¹²⁵ Ndi yeeya kuti cintu cipati maningi eco Paulo ncakali kuyanda, cindi na kati, “Ciindi cangu cakkwana eno,” kuyandisya kupati loko kwa moyo wa Paulo kwakali kwakuba sikujailwa buzumini. Oko kwakali kuyandisya kwa myoyo yabo yoonse mu mazuba ayo. Ikuti ba...Sena mwakasola kubala *Foxe's Book Of The Martyrs*, akwalo kubala akwalo *The Nicene Council*? I bulemu bupati maningi bwakali kukonzya kuba, cindi zimwi zyaandeene (a Polycarp a bamwi) keenda mu bulyango bwa balavu, ba koongolola a lutangalo. Keenda omuya mukuziba kuti bakali kuyo jaigwa nkaambo ka lusyomo lwabo. Cindi niba kaumpwa ku cijailo, ba kakwiila a lutangalo, nkambo ka lulemeko lwa kuba sikufwida lusyomo lwabo. Cindi Paulo naka selemukila ku cijailo eco, kuti aka gonkwe mutwe wakwe, kusololelwa kuzwa kung'anda ya ntolongo eyo, busena buniini bwabuloko maningi bwakaindi kunselelo okuya, mu cigodi mu bulambo, moba kamubikkide. Nda keenda omuya aku bulanga. Kaanda kakaindi kusule okonkoba kasyanikizya mubili wakwe muli nkako. Elyo lino uyanda ku mubamba kuba musalali na cintucimwi cimbi. Nkamu njionya ya bantu! Ngooyo wa keenda kunselelo okuya. Wa kati, “O lufu, luli kuli lumoola lwako? Cuumbwe, kulaali kuzunda kwako? Pele kulumbwe kuli Leza Oyo uutupa kuzunda kwiinda mu Mwami Jesu Kristo. Nda kalwana nkondo mbotu. Nda kaimanizya nzila. Nda kabamba Lusyomo. Kuli musyini uubikkidwe aali ndime, alimwi kutali buyo wa ndime, pele boonse abo bayanda kulibonya Kwakwe.”

¹²⁶ Twa selemukila ku kampango ka 6 lino, kuli ka 18. Nse zyi mbo iya kundi balila, pele Ndi balulula biyo mbo caka balilwa bamwi. Elyo Ndiyo zumanana kukkala cakusyomeka ku Ijwi kusikila Aka manizye. Awo mpempawo mulimo mpoubede sunu. Nse manide pe. Nda syoma Ndili mukusanzigwa buyo mukati. Nce ncico. Mbo mbubo. Atu kotamike mitwe yesu lino kuciindi notu komba...?...

¹²⁷ Kuli ntambo niini isika ansi kuzwa ku Cuuno cabwami sunumasiku, iitegwa Ntamboyabuumi. Kuciindi Ne komba, Ndi syoma kuti ila kwekwela muni lya muntu uutana sanduka omuno. Sa inga toboola a ku cijata, mweenzuma sizibi? Yebo wati, “Mukwesu Branham, waamba kuti wali kuya bukomena, alimwi Ndi yeeyela kuti ako nke kaambo ncoli...” Peepe, mukwesu, mucizi. Cindi ni Nda kali mulombe buyo muniini, Nda kasyoma Eci. Nda kapa buumi bwangu nkambo ka Ncico. Alimwi kuli kuusa komwe biyo Nkwe jisi, Nse jisi pele buumi bomwe bwa kupa. Ikuti Ne jisi maumi ali zyuulu zili kkumi Ne kayanda kwaapa onse kuli Ndilyo. Inzya.

¹²⁸ Sena toko jata Ntambo cindi yainda muni sunumasiku, munzila yako? Yebo wati, “Mukwesu Branham, Ta ndeileli ku Li jata.” Ndi lizi toli boobo, mwana. Pele wainka kucita

cintucimwi campindu, aku ndaambila ncoka cita, Ndi yanda kucicita, ambebo. Taakwe cintu nco konzya kujana ceelela. Wa kazyalwa cakuteelela. Kuli cintu comwe biyo nco konzya kucita, kojata buyo nzila eyo yaka bambilwa nduwe. Uli mukunyikila, uta nyikili muli ceeco. Leza wa waala Ntamboyabuumi, atu—atu tambikizya a kwijata sunumasiku.

¹²⁹ Taata Wakujulu, Nda yeeya mpoonya awa aa desiki eli ndilyonya, busena obu mbubonya awo Mpe kanana cifumo eco, kuti cindi Ne katuula mbungano mpoonya aa busena obu awa. Alimwi eco ciswi cabuyake cili bikkidwe alya, cicijisi cibela cizwa ku Bbaibbele eco Nce kalemba. Nda kati, “Mwami Jesu, a luzyalo Lwako Njo kkala cakusyomeka ku Ijwi.” Elyo eno Ndila cibona kaciletwa mbubonya buyo mbo cakacitwa mu ziindi zimbi. Elyo mpaawa Ndili mu cikombelo eci sunumasiku, kumane kweenda inyika, kujoka alubo, elyo ciswi cabuyake ciniini icibikkidwe awo nkabela pepa lili muli ncico. Kondi lingula, Mwami Leza. Ndila lubizya loko. Nda—Nda kabisya, Mwami. Ziindi zainji Nda ka Ku kacilwa, mbuli mbo Nda lungulula buyo kaindi kainda kutandila kukakilwa. Leza, Ndi—Ndi, kufwambaana mbuli Mbwe cicita, Ndi—Ndi—Ndi yanda kujatilwa. Mu moyo wangu Nda Ku yanda. Ndi—Ndi lizi Wa kandi tondezya calino kujatikizya obo busena nko tuya. Ta ndizi cindi Wa manizya a ndime lino, Mwami. Ndili—Ndili waano sunumasiku, Ndi. . . ku luzyalo Lwako. Elyo Ta—Ta ndizi cindi Wa manizya, pele Ndi lizi eci ceelede kusika kuli ceeci. Pele cindi caboola ciindi eco, Ta—Ta ndiyandi kuba mukandu. Ndi yanda kwiima mbuli bamwi babo mbo bakaimikila. Pele, Leza, ikuti—ikuti—ikuti na Nde elede kuzulizya bumboni bwangu a buumi bwangu bwini, na kufumbwa mbo ceelede kucitwa, Mwami, ko bu samika musyini mpawo. Kutali kundi samika musyini; kusamika musyini ku mulimo oyo Ngwe kakambauka, Mwami, ndi Ijwi Lyako. Elyo Ndi lizi kuti Ijwi lila konzya maningi kundi busya alimwi ku bubuke. Elyo Nse fwinsoni zya Ijwi Nde kakambauka, nkaambo Ni nguzu zya Leza ku lufutuko kuli boonse basyoma.

¹³⁰ Nda Ku lumba ku mbungano niini iciimvwi asunu. Cindi Ne kabweza kwiiminina Ijwi, basinsimi bakasinsima akuti, “Mu myezi ili cisambomwe iyo sanduka kuba garaji.” Myaka ili makumi otatwe yakainda, uli mu mulilo kunji sunu kwiinda mbo cakabede mu myaka. “Atala aa mwaala oyu Mpe nzoyakila Mbungano Yangu.” Twa Ku lumba ku mweembeli wesu. Twa Ku lumba kuli bamadaikona, basyomesi. Toonse tu jisi cibeela ciniini ca kucita, Mwami, elyo tu yanda ku cicita mu kusyomeka, tu yanda kucicita kabotu.

¹³¹ Inga kwaba bamwi omuno bayanda kusangana a ndiswe sunumasiku, Mwami. A nzila mbo baciswaanganya, nku jata buyo eyi Ntamboyabuumi niini akutalika kukwela, Kwi zambaila akati kamaswaanino a janza atansyi, Ya ange ku moyo

wabo, a kuti, “Lino, Mwami, kwela, kondi nyamuna,” elyo bayo yutuka a kumweka mbuli ngolide. Ko cipa, Mwami. Tu langila ciindi eco.

¹³² Tula syoma kuti cili munsu kumamanino. Tula bona kuti mbuli mbo twali kuyiisya awa, Bukkalo bwa Mbungano ya Laodikeya buli eno, tula bona taku konzyi kuba cintu cimbi cicitika pele Kuboola kwa Mwami. Alimwi, Mwami, sa oyo inga tii waba musyini mupati wa Ijwi, kubona Musyimi Mwini kasika? Ndi yanda kwiima awa a kwaamba, “Ngooyo Mbwa bede, oyo ngu Kabelele.” Mbuli Johane mbwa kacita. “Amubone Kabelele oyo ngo twakali kulindila, oyu ngo Nguwe.” I Mwami uyo boola cakufwambaana ku tempele Lyakwe, kutola bantu Bakwe mu Kukwempwa.

¹³³ Kotubamba kulibambila, Taata. Kosalazya myoyo yesu mu Bulowa Bwako. Kotu bamba kunjoloma a kusalala, kutegwa Ijwi Lyako likonzye ku kkalilila muli ndiswe. Alimwi akube kuti tuyeeye kuteeti twe elede kucitaula aa Ijwi, kutegwa Lyalo lijate a kuba anguzu. Kopa basizibi boonse kweempwa. Koleleka bantu boonse abo bali muno. I basalali, abo, bamwi aba basilumamba bayandisi bakaindi, Mwami, bali muku lwana mu mundando kwa myaka, kafubaazya, kwaambaulwa a kusabula. Ba ciyabuya nkaambo kakuti bajisi Buumi. Ba limuzi Oyo ngo bakasyoma, a kulamwa kuti Ula konzya kubamba ceeco nciba katuula kuli Nguwe. Twa Ku lumba kuli ceeco. Komba kuti Uyo ponya balwazi abo bali akati kesu. Gwisya zibi zyesu zyoonse a malwazi oonse. Elyo, Taata Leza, ko jana bulemu kuli Lwako.

¹³⁴ Ndi jisi beenzuma banji loko bayandisi, Mwami. Nda—Nda bayanda, alimwi Ndi lizi bantu bambi bakacita mucuindi coonse ca bukkalo, abalo. Beenzuma bayandisi, beenzinyina bayandwa, bakubusyi a bapati, nkabela tula bayanda a myoyo yesu yoonse. Lino kotu bamba kuba bwini, Mwami, cabwini buyo ku Ijwi, kutegwa tuka baswaangane mu nyika mbotu buzubabumwi oko kutacikabi kuusa nanka buusu. Tu langila Kuboola kwa Mwami, cakufwambaana. Tula syoma kuti Uyo boola.

¹³⁵ Lino longezya sikutasyoma awa sunumasiku, Mwami, alimwi akube kuti abe musyomi aku Ku zumina mbuli Mufutuli wakwe sunumasiku.

¹³⁶ Elyo kuciindi notu kotamikide mitwe yesu, ikuti na kuli umwi awa a mutwe wako kuukoteme, inga wati, “Mukwesu Branham, kungsi kwini mu moyo wangu, Ndi—Ndi yanda kusika kumamanino aa lweendo, kulwana nkondo mbotu. Ndi yanda kuba Munakristo. Ndiyo tambika janza lyangu.” Leza aku longezye, nkabela Leza aku longezye. Eco ncibotu. Leza aku longezye, yebo. “Ndi yanda kuboola ku mamanino aa lweendo lwangu, a kulwana kubotu kusule lyangu. Nda tambula Kristo ndyoonya lino. Ndi yanda kuti Abe Mugwasyi wangu.” Yaa, Mwami amu longezye. Leza aku longezye, omulindu kusule. Eco

ncibotu. Uli—Uli kuzyi. Nda kaiya kunji kujatikizya Nguwe mu myaka eyi yoonse, kutandila myaka ili makumi otatwe aibili lino kunze lya cikambaukilo, Nda kaiya kunji kujatikizya Nguwe lino kuziba kuti Uli zyi kweenda koonse nko panga. Ula bona kayuni. I masusu aa mutwe wako ali balidwe. Mwabona, Uli zyi koonse kujatikizya nkako. Ko tambika buyo janza lyako, a ku cikanza, nku konse koelede kucita. Alimwi kuli meenda abambidwe.

¹³⁷ Amuyeeye, ino ucita nzi? Yebo weempwa, kosyoma aa Makanimabotu, elyo mpawo kubbizigwa (Ku kaambonzi?) nkambo... mu Zina lya Jesu Kristo, ku kujatilwa kwa zibi zyako. Obo mbumboni bwako, kuti mbobede. Zibi zyako zyamana cindi wa bbizigwa; wa zyaamba, nkabela ula syoma. Sa inga tojana Ntamboyabuumi lino mbuli Mbo lukwela ku moyo wako oonse, a kwaamba, “Boola nzila eyi, muzwamasi. Amweenda a Ndime, kulika ciingano Cangu ali nduwe. AmwiiyE Ndime, Ndi mubombe amutete mu moyo, alimwi mikuli Yangu myuuba.” Amu tambike buyo a ku Li jata.

¹³⁸ Mbangaye Banakristo bali mu Nzila sunumasiku, omuno, abo bakkomene kuti mwatalika ciindi cilamfu cakainda? Wacita kutalika kwako, alimwi kulaale mu lweendo, ku ciselemuka kutozya kumamanino. Nda komba kuti Leza uyo samika musyini mulimo wako, kufumbwa mbo cibede. Inga waba mukaintu waang’anda. Nda lomba kuti Leza uyo samika musyini ku mulimo wako. Inga waba mukambausi. Inga waba daikona. Inga waba membala buyo. Inga kali mulimi. Ta ndizi mbo cibede. Kufumbwa mbo cibede, akube kuti Leza a samike buumi bwako kumebesya bulemu bwa Ijwi Lyakwe, a Kuboola Kwakwe Kwabili kubetola kuya mu Nyika imbi oko nkoya kulimvwa mbuli kaswi ako Nkeli kukanana, kuzwa mu mudima oyo kungsi okuya. Mwabona, inga toinka kutala Kuya a musyobo oyu wa mubili. Akwalo tokonzyi kutanta mujulu mbuli aba ba astronanti, wabona, weelede kuba mu tanki lifundilide. To fundilizidwe kuli nkuko. Pele cindi Leza aku cinca, ula fundilizigwa mpawo, uya mu Kukwempwa mpawo. Cindi aya magano akaindi anyika asweeka, alimwi wa inka mu nzila eyo yabulemu ya ciingano, kuya ku Muunzi a Jesu.

¹³⁹ Lino, Taata Leza, twa Ku lumba nkambo ka maanza aya atambikwa kuba Banakristo. Ndi syoma kuti ba cikanza mu myoyo yabo. Nda bakombela, kuti taba kakakilwi kufumbwa ciindi. Elyo ikuti na ba kakilwa, akube kuti cakufwambaana babe a oyo Sikwaambilila kuli Taata. Eco Nce kaiya kuba cintu cipati boobu, Taata, kuti cindi Nda cita bulubizi bwangu boonse, mpawo Ndi jana kuti Ndi jisi Sikwaambilila, cakufwambaana nconzyo, a Taata, kwiinda muli Jesu Kristo. Elyo Nda josegwa mu luzyalo alubo. I janza lya luyando ilya Mwami lila salazya, kuli Cituuzyo cizwide malowa cileda alya eco Nce wamba kuba Mufutuli wangu.

¹⁴⁰ Boonse bacisidwe a babulide, Nda komba kuti Uyo bapa

kubula kwabo a kuponya bulwazi boonse, Mwami. Elyo abo bali waano lino bakkede kungsi lya bunanike obu bwabulemu bwa Muuya Uusalala, mbuli mbo tu Bumvwa cabubotu loko kutilwa buntu bwesu.

¹⁴¹ Taata Leza, Uli zyi Nceli kuyeeya cijatikizya kuselemuka kuzwa ku Canada buzuba bumwi. Nda kayeeya, “Oh, obo Mbwe kalino yanda kunjila mu lubukulusyo lwakaindi alubo, a basalali buyo ba Leza, kabaimba, a nguzu zya Leza, kaziwa.” Oh, obo moyo wangu mbowakali kusukamina ncico, Mwami. Akube kuti kumwaike lubukulusyo luli boobu mu cikombelo eci, oh, kuti nguzu zya Leza ziyo—ziyo tila mu tulonga twa luzyalo, kunjila mu moyo yoonse.

¹⁴² Nda Ku lumba ku busena obu buniini, Mwami. Tii twa kali kukonzya ku cibamba nzila eyi, lwakali luzyalo Lwako lwaka cibamba kuba ca kumuuya. Elyo lino Nda syoma, Mwami, kasena kaniini kumuuya maningi mu cisi, ako nke Ndi zyi, uli mpoonya awa ku Kagwagwa ka Eighth a Penn. Obo Mbwe Kulumba kuli ceeci, Mwami! Kunjila mu mabungano akuba bona kaba tontola a kucimwa, a banakazi kabali acamba loko cakuti akwalo taba konzyi kuba abweeme eme, a kutali “ameni” na mizozi a masaya, na taakwe, elyo kwiina lufutuko, taakwe cintu pele kusangana buyo mbungano yabo a kwaamba kayanza kabo kabuzumini. O Leza, mpawo njila busena bubotu buniini bukasaala awo mililo mpo iyakidwe aa cipaililo coonse ca moyo wabo. Ino nkuumbulizigwa mbo kubede, Taata! Ino nduumbulizyo! Nda Kulumba, Taata, alimwi acibe lyoonse kusikila ku Kuboola kwa Mwami Jesu. Kotu leleka antoomwe lino.

¹⁴³ Alimwi juunza ni Sabata. Alimwi, Mwami, ndigwasye kuseeni, ikuti na cawida bulizi bwangu ku kambauka ali eyo *Kkauntidauni*. Leza, akube kuti Ndi konzye ku cileta mu nzila ili boobo kusikila bantu baka cibone, Mwami. Elyo lino akube kuti babone ciimo ca mulimo, a waawo mpo cibede, aceco nco tulindila, akaambo zintuzyonse nco zyeenda munzila iliko. Akube kuti ba bale kuzwa ku kampango ka 5 kuyabuya, elyo mpawo kuziba busena obo mbo twiimvwi.

¹⁴⁴ Elyo lino, Taata, Nda komba kuti Uyo tulongezya a kutupa kupumuna kubotu mu mibili yesu, a kutujosya juunza. Longezya bantu aba boonse baimvwi ku malambo oonse, a kuyaama kuzwa ku tende lyomwe kusika kuli limbi. Banakazi, baalumi, bakaima mu mvula omuya, a kuzunguluka mpulungwido, a kukkala mu myootokala yabo, a koonse akoonse. Nda komba kuti Uyo balongezya, Mwami. Akube kuti baunke ku muunzi a luzyalo lwa Leza mu moyo wabo. Nda komba mu Zina lya Jesu. Amen.

¹⁴⁵ Sena mwamvwisya lino? Amubale kuzwa, lutaanzi, Timoteo Wabili 2:4, Timoteo Wabili 4, kuzwa ku kampango ka 5 kuyabuya ansi, kotana kuunka ku bulo sunumasiku, ikuti na

wakonzya, nkabela uyo bona awo mpo tubede. Nkaambonzi balo baalumi ncoba kamusiya? Nkaambonzi tiiba kaboola? Elyo lino amwezyanisye buyo mulimo oyo aceeco neo twiindamo sunu. Kweezyanisya lwiiyo lwa Musalali Paulo. Amuyeeye mu cintu ciniini ca Kujulu eco nce Nda kabona, Nda kati, “Ee, sa Paulo uyo elela kwiima a bantu bakwe?”


Ba kati, “Iyi.”

¹⁴⁶ Nda kati, “Nda kakambauka Ijwi ndilyonya ndya kacita, mbubonya buyo, kakkala a Makanimabotu ngaonya.”

¹⁴⁷ Elyo bali mamilioni baka waala maanza abo mujulu akuti, “Tu yaamide ali Ceeco.”

¹⁴⁸ Mwami amu longezye. Sena mula Mu yanda?

Kusikila tuka swaangane! Mane tuka
swaangane!

Mane tuka swaangane! 

62-0908 Ciimo Calino Ca Mulimo Wangu
Branham Tabernacle
Jeffersonville, Indiana U.S.A.

CHITONGA

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kuzibya Kwa Nguzu Zyakkopi

Nguzu zyoonse zilitaminidwe. Eli bbuku inga lyalembwa ku purinta yaku ng'anda ku kubelesya kwamuntu na kuvozegwa, kakutakwe kubbadelesya, mbuli cibelesyo ca kumwaisya Makani mabotu aa Jesu Kristo. Eli bbuku talikonzyi kusambalwa, kulembululwa muciiimo cipati, kubikwa aa webbusaiti, kuyobolwa mu cianza cakujokolosya, kusandululwa mu misyobo iimbi, na kubelesegwa kulomba lugwasyo lwa mali kakutakwe kuzumizigwa kulembedwe kwabumboni aa Voice Of God Recordings®.

Ku makani aamba na cakubelesya cimbi ciliko, walombwa kukwaba ku:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org